



北史



リ 8
1735
192



北史卷四

魏本紀第四

世宗宣武皇帝諱恪孝文皇帝第二子也母曰高夫人初夢為日
 所逐避於牀下日化為龍繞已數匝寤而驚悸遂有娠太和七年
 閏四月生帝於平城宮二十一年正月景申立為皇太子二十三
 年四月景午孝文帝崩丁巳太子即皇帝位諒闇委政宰輔五月
 高麗國遣使朝貢六月乙卯分遣侍臣巡行州郡問人疾苦考察
 守令黜陟幽明褒禮名賢戊辰追尊皇妣曰文昭皇后秋八月戊
 申遵遺詔孝文皇帝三夫人已下悉免歸家癸丑增宮臣位一級
 冬十月癸未鄧至國王象舒彭來朝景戌謁長陵丁酉享太廟十
 一月幽州人王惠定聚眾反自稱明法皇帝刺史李肅捕斬之是
 歲州鎮十八水饑分遣使者開倉振恤

書

所購以贈

書

魏川中圖

景明元年春正月辛丑朔日有蝕之壬寅謁長陵乙巳大赦改元
丁未齊豫州刺史裴叔業以壽春內屬二月戊戌復以彭城王勰
爲司徒齊將胡松李居士軍屯宛陳伯之水軍逼壽春夏四月景
申司徒彭城王勰車騎將軍王肅大破之己亥皇弟桃薨五月甲
寅北鎮饑遣兼侍中揚播巡撫振恤六月景子以司徒彭城王勰
爲大司馬秋七月己亥朔日有蝕之齊將陳伯之寇淮南八月乙
酉彭城王勰破伯之於肥口九月齊州人柳世明聚衆反冬十月
丁卯朔謁長陵庚寅齊克二州討世明平之丁亥改授彭城王勰
司徒錄尚書事十一月丁巳陽平王願薨是歲州鎮十七大饑分
遣使者開倉振恤高麗吐谷渾等國並遣使朝貢
二年春正月景申朔謁長陵庚戌帝始親政遵遺詔聽司徒彭城
王勰以老歸第進太尉咸陽王禧位太保以司空北海王詳爲大

將軍錄尚書事丁巳引見羣臣於太極前殿告以覽政之意壬戌
以太保咸陽王禧領太尉以太將軍廣陵王羽爲司空分遣大使
黜陟幽明二月庚午進宿衛之官位一級甲戌大赦三月乙未朔
詔以比年連有軍旅正調之外皆蠲罷壬戌青齊徐兗四州大饑
人死者萬餘口是月齊雍州刺史蕭衍奉其南康王寶融爲主東
赴建鄴夏五月壬子廣陵王羽薨壬戌太保咸陽王禧謀反賜死
六月丁亥考諸州刺史加以黜陟秋七月癸巳朔日有蝕之乙巳
蠕蠕犯塞辛酉大赦九月丁酉發畿內夫五萬五千人築京師三
百二十坊四旬罷己亥立皇后于氏乙卯免壽春營戶並隸揚州
冬十一月景申以驃騎大將軍穆亮爲司空丁酉以大將軍北海
王詳爲太傅領司徒壬寅改築圓丘於伊水之陽乙卯仍有事焉
十二月齊直後張齊殺其主蕭寶卷以降蕭衍是歲高麗吐谷渾

等國並遣使朝貢

三年春二月戊寅以旱故詔州郡掩骸骨三月齊建安王寶寅來奔夏四月詔撫軍將軍李崇討魯陽反蠻齊主蕭寶融遜位於梁閏四月丁巳司空穆亮薨秋七月丁巳朔日有蝕之八月丁卯以前太傅平陽公元丕為三老九月丁巳行幸鄴丁卯詔使者弔比干墓戊寅閱武於鄴南冬十月庚子帝躬御弧矢射遠及一里五十步羣臣勒銘於射所甲辰車駕還宮十二月壬寅以太極前殿初成饗羣臣賜布帛有差是歲河州大饑死者二千餘口西域二十七國並遣使朝貢

四年春正月乙亥親畊籍田三月己巳皇后先蠶於北郊四月癸未朔以蕭寶寅為東揚州刺史封丹楊郡公齊王庚寅南天竺國獻辟支佛牙戊戌為旱故命鞠寃獄己亥減膳徹懸辛丑澍雨大

洽五月甲戌行梁州事楊椿大破反氏六月壬午朔封皇弟悅為汝南王秋七月乙卯三老平陽公元丕薨庚午詔復收鹽池利辛未以彭城王勰為太師八月勿吉國貢楛矢冬十一月己未封武興國世子楊紹先為武興王

正始元年春正月景寅大赦改元夏五月丁未朔太傅北海王詳以罪廢為庶人六月以旱故徹樂減膳癸巳詔有司修案舊典祇行六事甲午帝以旱故親薦享於太廟戊戌詔立周旦夷齊廟於首陽山庚子以旱故公卿以下引咎責躬又錄京師見囚殊死以下皆減一等鞭杖之坐悉原之秋七月景子假鎮南將軍李崇大破諸蠻八月景子假鎮南將軍元英破梁將馬仙琕於義陽詔洛陽令有大事聽面敷奏乙酉元英攻拔義陽辛卯英又大破梁軍仍清三關丁酉封英為中山王九月詔諸州蠲停徭役不得橫有

徵發蠕蠕犯塞詔左僕射源懷討之冬十月乙未詔斷群臣白衣
募吏十一月戊午詔有司依漢魏舊章營繕國學十二月景子以
苑牧公田分賜代遷戶已卯詔羣臣議定律令閏月癸卯朔行梁
州事夏侯道遷據漢中來降乙丑以高陽王雍爲司空是歲高麗
遣使來朝貢

二年春正月景子封宕昌世子梁彌博爲宕昌王二月梁州氏蜀
反絕漢中運路州刺史邢巒頻大破之夏四月己未城陽王鸞薨
乙丑詔曰中正所銓但爲門第吏部彞倫仍不才舉八坐可審議
往代擢賢之體必令才學並申資望兼致邢巒遣統軍王足西伐
頻破梁諸軍遂入劔閣秋七月戊子王足擊破梁軍因逼涪城八
月壬寅詔中山王英南討襄沔冬十一月戊辰朔武興王楊紹先
叔父集起謀反詔光祿大夫楊椿討之王足國涪城益州諸郡戎

降者十二三送編籍者五萬餘戶旣而足引軍退是歲鄧至國遣
使朝貢

三年春正月丁卯朔皇子昌生大赦壬申梁秦二州刺史邢巒連
破氐賊尅武興秦州人王智等聚衆自號王公尋推秦州主簿呂
苟兒爲主年號建明已卯楊集起兄弟相率降二月景辰詔求謹
言戊午詔右衛將軍元麗等討呂苟兒三月己巳以戎旅與詔停
諸作已卯樂良王長命坐殺人賜死庚寅平南將軍曲江縣公陳
伯之自梁城南奔夏四月丁未詔罷鹽池禁五月景寅詔以時澤
未降春稼已旱或有孤老餒疾無人贍救因以致死暴露溝塹者
令洛陽部尉依法棺埋秋七月庚辰元麗大破秦賊降呂苟兒及
其王公三十餘人秦涇二州平戊子中山王英大破梁徐州刺史
王伯敖於陰陵已丑詔發定冀瀛相并肆六州卒十萬以濟南軍

八月壬寅安東將軍邢巒破梁將桓和於孤山諸將所在剋捷兗州平壬戌曲赦涇秦歧涼河五州九月癸酉邢巒大破梁軍於淮南遂攻鍾離冬十一月甲子帝爲京兆王愉清河王懌廣平王懷汝南王悅講孝經於式乾殿是歲高麗蠕蠕國並遣使朝貢四年夏四月戊戌鍾離大水中山王英敗績而還六月己丑朔詔有司準前式置國子立太學樹小學於四門秋八月己亥中山王英齊王蕭寶寅坐鍾離敗除名辛丑敦煌人饒詔開倉振恤九月己未詔以徙正宮極庸績未酬以司空高陽王雍爲太尉尚書令廣陽王嘉爲司空百官悉進位一級庚申夏州長史曹明謀反伏誅甲子開斜谷舊道景戌司州人饑詔開倉振恤閏月甲戌禁大司馬門不得車馬出入冬十月丁卯皇后于氏崩自碣石至於劔閣東西七千里置二十二郡尉是歲西域東夷四十餘國並遣使

朝貢

永平元年春三月戊子皇子昌薨景午以去年旱儉遣使者所在振恤夏五月辛卯帝以旱故減膳徹懸六月壬申詔依洛陽舊圖脩聽訟觀秋七月甲午立夫人高氏爲皇后八月壬子朔日有蝕之癸亥冀州刺史京兆王愉據州反丁卯大赦改元九月景戌復前中山王英本封戊戌殺太師彭城王勰癸卯假鎮北將軍李平尅信都冀州平冬十月豫州彭城人白早生殺刺史司馬悅據城南叛十二月己未尚書邢巒尅懸瓠斬早生禽梁將齊苟兒等是歲北狄東夷西域十八國並遣使朝貢高昌國王麴嘉表求內徙二年春正月涇州沙門劉慧汪聚衆反詔華州刺史奚康生討之夏四月己酉武川鎮饑詔開倉振恤甲子詔緣邊州鎮自今一不聽寇盜境外犯者罪同境內五月辛丑帝以旱故減膳徹懸禁斷

屠殺甲辰幸華林都亭錄囚徒死罪以下降一等六月辛亥詔曰
江海方同車書宜一諸州軌轍南北不等今可申敕四方遠近無
二秋八月景午朔日有蝕之戊申以鄧至國世子像覽蹄爲其國
王九月辛巳封故北海王子顥爲北海王壬午詔定諸門闈名冬
十月癸丑以司空廣陽王嘉爲司徒庚午郢州獻七寶牀詔不納
冬十一月甲申詔禁屠殺含孕以爲未制巳丑帝於式乾殿爲諸
僧朝臣講維摩詰經十二月詔五等諸侯其同姓者出身公正六下
侯從六上伯從六下子正七上男正七下異族出身公從七上侯
從七下伯正八上子正八下男從八上清修出身公從八下侯正
九上伯正九下子從九上男從九下是歲西域東夷二十四國並
遣使朝貢

三年春二月壬午秦州沙門劉光秀謀反州郡捕斬之癸亥秦州

隴西羗殺鎮將趙儁反州軍討平之三月景戌皇子詡生大赦夏
四月平陽郡之禽昌襄陵二縣大疫自正月至此月死者二千七
百三十人五月丁亥冀定二州旱儉詔開倉振恤六月壬寅詔重
求遺書於天下冬十月辛卯中山王英薨景申詔太常立館使京
畿內外疾病之徒咸令居處嚴敕醫署分師救療考其能否而行
賞罰又令有司集諸醫工惟簡精要取三十卷以班九服十二月
辛巳江陽王繼坐事除名甲申詔於青州立孝文皇帝廟殿中侍
御史王敞謀反伏誅是歲西域東夷北狄十六國並遣使朝貢
四年春正月丁巳汾州劉龍駒聚衆反詔諫議大夫薛和討之二
月壬午青齊徐兗四州人饑甚遣使振恤二月壬戌司徒廣陽王
嘉薨夏四月梁遣其鎮北將軍張稷及馬仙琕寇朐山詔徐州刺
史盧昶率衆赴之五月巳亥遷代京銅龍置天泉池西景辰詔禁

天文學冬十一月朔山城陷盧祖大敗而還十二月壬戌朔日有
蝕之是歲西域東夷北狄二十九國並遣使朝貢

延昌元年春正月乙巳以頻年水旱百姓饑弊分遣使者開倉振
恤景辰以尚書令高肇爲司徒清河王懌爲司空三月甲午州郡
十一大水詔開倉振恤以京師穀貴出倉粟八十萬石以振恤貧
者己未安樂王詮薨夏四月詔以旱故斷食粟之畜丁卯詔曰遷
京嵩縣年將二紀博士端然虛祿靖言念之有兼愧慨可嚴敕有
司國子學孟冬使成太學四門明年暮春令就戊辰以旱故詔尚
書與羣司鞠理獄訟辛未詔饑人就穀六鎮丁丑帝以旱故減膳
徹懸癸未詔曰肆州地震陷裂死傷甚多亡者不可復追生病宜
加療救可遣太醫折傷醫并給所須藥就療乙酉大赦改元詔立
理訴殿申訟車以盡冤窮之理五月景午詔天下有粟之家供年

之外悉貸饑人自二月不雨至於是月己未晦日有蝕之六月壬
申澍雨大洽戊寅通河南牝馬之禁庚辰詔出太倉粟五十萬石
以振京師及州郡饑人冬十月乙亥立皇子詡爲皇太子十一月
景申詔以東宮建賜天下爲父後者爵一級孝子順孫廉夫節婦
旌表門閭量給粟帛十二月己巳詔守宰爲御史彈赦免者及考
在中第皆代之是歲西域東夷十國並遣使朝貢

二年春正月戊戌帝御申訟車親理冤訟二月景辰朔振恤京師
貧人甲戌以六鎮大饑開倉拯贍己卯進太尉高陽王雍位太保
閏月辛丑以苑牧地賜代遷人無田者是春人饒死者數萬口夏
四月庚子以絹十五萬疋振河南郡人五月甲寅朔日有蝕之是
月壽春大水遣平東將軍奚康生等步騎數千赴之六月乙酉青
州人譏詔使者開倉振恤甲午曲赦揚州辛亥帝御申訟車親理

冤訟是夏十三郡大水秋八月辛卯詔以水旱飢儉百姓多陷罪辜降死以下刑九月景辰以貴族豪門崇習奢侈詔尚書嚴立限給節其流宥冬十月詔以恒肆地震人多死傷重丐一年租賦十二月景戌丐洛陽河陰二縣租賦乙巳詔以恒肆地震人多離災其有課丁沒盡老幼單立家無受復者各賜廩粟以接來稔是歲東夷西域十餘國並遣使朝貢

三年春二月乙未詔曰肆州秀容郡敷城縣雁門郡原平縣並自去年四月以來山鳴地震于今不已告譴彰咎朕甚懼焉可恤瘼寬刑以答災譴夏四月青州人饑辛巳開倉振恤乙巳上御申訟車親理冤訟秋八月甲申帝臨朝堂考百司而加黜陟冬十一月辛亥詔司徒高肇爲大將軍平蜀大都督步騎十五萬西伐益州丁巳幽州沙門劉僧紹聚衆反自號淨居國明法王州郡捕斬之

十二月庚寅詔立明堂是歲東夷西域八國並遣使朝貢

四年春正月甲寅帝不豫丁巳崩于式乾殿時年三十三二月甲戌朔上尊謚曰宣武皇帝廟號世宗甲午葬景陵帝幼有大度喜怒不形于色雅性儉素初孝文欲觀諸子志尚大陳寶物任其所取京兆王渝等皆競取珍玩帝唯取骨如意而已孝文大奇之及庶人恂失德孝文謂彭城王勰曰吾固疑此兒有非常志相今果然矣乃見立爲儲貳雅愛經史尤長釋氏之義每至講論連夜忘疲善風儀美容貌臨朝深嘿端嚴若神有人君之量矣

肅宗孝明皇帝諱詡宣武皇帝之第二子也母曰胡充華永平三年三月景戌生於宣光殿之東北有光照於庭中延昌元年十月乙亥立爲皇太子四年正月丁巳宣武帝崩是夜太子卽皇帝位戊午大赦已未徵下西討東防諸軍庚申詔太保高陽王雍入居

西栢堂決庶政以任城王澄爲尚書令百官總已以聽二王二月
庚辰尊皇后高氏爲皇太后辛巳司徒高肇至京師以罪賜死癸
未進太保高陽王雍位太傅領太尉以司空清河王懌爲司徒以
驃騎大將軍廣平王懷爲司空乙亥尊胡充華爲皇太妃三月甲
辰朔皇太后出俗爲尼徙御金墉城景辰詔進宮臣位一級乙丑
進文武羣官位一級夏六月沙門汰慶聚衆反於冀州殺阜城令
自稱大乘秋八月乙亥領軍于忠矯詔殺左僕射郭祚尚書裴植
免大傅高陽王雍官以王還第景子尊皇太妃爲皇太后戊子帝
朝太后於宣光殿大赦己丑進司徒清河王懌爲太傅領太尉以
司空廣平王懷爲太保領司徒任城王澄爲司空庚寅以車騎大
將軍于忠爲尚書令特進崔光爲車騎大將軍並儀同三司壬辰
復江陽王繼本國復濟南王暉先封爲臨淮王羣臣奏請皇太后

臨朝稱制九月乙巳皇太后親覽萬機甲寅征西大將軍元遙破
斬法慶傳首京師安定王燮薨冬十二月辛丑以高陽王雍爲太
師己酉鎮南將軍崔亮破梁將趙祖悅軍遂圍硤石丁卯帝皇太
后謁景陵是歲東夷西域北狄十八國並遣使朝貢

熙平元年春正月戊辰朔大赦改元荆沔都督元志大破梁軍以
吏部尚書李平爲行臺節度討硤石諸軍二月乙巳鎮東將軍蕭
寶夤大破梁將於淮北癸亥初聽秀才對策第中上巳上叙之乙
丑鎮南崔亮鎮軍李平等尅硤石斬趙祖悅傳首京師盡俘其衆
三月戊辰朔日有蝕之夏四月戊戌以瀛州人饒開倉振恤五月
丁卯朔以炎旱命釐察獄訟權停作役庚午詔放華林野獸於山
澤秋七月庚午重申殺牛禁八月景午詔古帝諸陵四面各五十
步勿聽耕稼九月丁丑淮堰破梁緣淮城戍村落十餘萬口皆漂

入海是歲吐谷渾宕昌鄧至高昌陰平等國並遣使朝貢

二年春正月大乘餘賊復相聚攻瀛州刺史宇文福討平之甲戌大赦庚寅詔遣大使巡行四方問疾苦恤孤寡黜陟幽明二月丁未封御史中尉元臣爲東平王三月丁亥太保領司徒廣平王懷薨夏四月丁酉詔京尹所統年高者板賜郡各有差戊申以開府儀同三司胡國珍爲司徒乙卯皇太后幸伊闕石窟寺卽日還宮改封安定王超爲北平王五月庚辰重申天文禁犯者以大辟論秋七月乙亥儀同三司汝南王悅坐殺人免官以王還第己巳享太廟八月戊戌宴道武以來宗室年十五以上於顯陽殿申家人禮己亥詔庶族子弟年未十五不聽入仕庚子詔咸陽京兆二王子女還附屬籍丁未詔太師高陽王雍入居門下參決尚書奏事冬十月以幽冀滄瀛光五州饑遣使巡撫開倉振恤是歲庚戌西

域氏羌等十一國並遣使朝貢

神龜元年春正日甲子詔以氏酋楊定爲陰平王壬申詔給京畿及諸州老人板郡縣各有差及賜鰥寡孤獨粟帛庚辰詔以雜役戶或冒入清流所在職人皆令五人相保無人任保者奪官還役乙酉秦州羌及幽州大饑死者三千七百九十人詔刺史開倉振恤二月己酉詔以神龜表瑞大赦改元東益州氏反三月南秦州氏反夏四月丁酉司徒胡國珍薨甲辰改封江陽王繼爲京兆王六月自正月不雨是月辛卯澍雨乃降秋七月河州人却鐵忽聚衆反自稱水池王閏月甲辰開恒州銀山禁八月癸丑朔詔京師見囚殊死以下悉減一等甲子却鐵忽詣行臺源子恭降九月戊申皇太后高氏崩于瑤光寺冬十月丁卯以尼禮葬高太后於芒山十二月辛未詔曰人生有終下歸北域京邑隱振口盈億萬貴

賤攸憑未有定所今制乾脯山以西擬爲九原是歲東夷西域北狄十一國並遣使朝貢

二年春正月辛巳朔日有蝕之丁亥詔曰皇太后撫挹自居稱號弗備宜遵舊典稱詔宇內以副黎蒸元元之望是月改葬文昭皇太后高氏二月乙丑齊郡王祐薨庚午羽林千餘人焚征西將軍張彝第毆傷彝燒殺其子均乙亥大赦丁丑詔求直言壬寅詔以旱故命依舊雩祈察理冤獄掩骼埋骸振窮恤寡三月甲辰澍雨大洽夏五月戊戌以司空任城王澄爲司徒京兆王繼爲司空秋八月乙未御史中尉東平王匡坐事削除官爵九月庚寅皇太后幸嵩高山癸巳還宮冬十一月癸丑司徒任城王澄薨庚申大赦詔除淫祀焚諸雜神是歲吐谷渾宕昌嗾噠等國並遣使朝貢正光元年春正月乙亥朔日有蝕之夏四月景辰詔尚書長孫承

業巡撫北蕃觀察風俗五月辛巳以炎旱故詔八座鞠見囚申枉濫秋七月景子侍中元義中常侍劉騰奉帝幸前殿矯皇太后詔歸政遜位乃幽皇太后北宮殺太傅清河王懌總勒禁旅決事殿中辛卯帝加元服大赦改元內外百官進位一等八月甲寅相州刺史中山王熙舉兵欲誅騰不果見殺九月壬辰蠕蠕主阿那瓌來奔戊戌以太師高陽王雍爲丞相冬十月乙卯以儀同三司汝南王悅爲太尉十一月己亥封阿那瓌爲朔方郡公蠕蠕王十二月壬子詔送蠕蠕王阿那瓌歸北辛酉以司空京兆王繼爲司徒二年春正月南秦州氏反二月車駕幸國子學講孝經三月庚午幸國子學祠孔子以顏回配甲午右衛將軍奚康生於禁中將殺元義不果爲又所害以儀同三司劉騰爲司空夏四月庚子進司徒京兆王繼位太保壬寅以儀同三司崔光爲司徒五月丁酉朔

日有蝕之秋七月己丑以旱故詔有司修案舊典祇行六事八月
己巳蠕蠕後主郁久間侯匿伐來奔懷朔鎮十二月甲戌詔司徒
崔光安豐王延明等議定服章庚辰以東益南秦州氏反詔河間
王琛討之失利是歲焉萇居密波斯高昌勿吉伏羅高車等國並
遣使朝貢

三年春正月辛亥耕籍田夏四月庚辰以高車國主覆羅伊訶爲
鎮西將軍西海郡公高車國王五月壬辰朔日有蝕之六月己巳
以旱故詔分遣有司馳祈岳瀆及諸山川百神能興雲雨者命理
寃獄止土功減膳徹懸禁止屠殺冬十一月己丑朔日有蝕之乙
巳祀圓丘景午詔班曆大赦十二月癸酉以太保京兆王繼爲太
傅司徒崔光爲太保是歲波斯不溪龜茲吐谷渾並遣使朝貢
四年春二月壬申追封故咸陽王禧爲敷城王京兆王愉爲臨洮

王清河王懌爲范陽王以禮加葬丁丑河間王琛章武王融並以
貪污削爵除名己卯蠕蠕主阿那瓌率衆犯塞遣尚書左丞元孚
爲北道行臺持節喻之蠕蠕後主郁久間侯匿伐來朝司空劉騰
薨夏四月阿那瓌執元孚北遁秋八月癸未追復故范陽王懌爲
河間王九月丁酉詔太尉汝南王悅入居門下與丞相高陽王雍
參決尚書奏事冬十一月癸未朔日有蝕之景申趙郡王謚薨丁
酉太保崔光薨十二月以太尉汝南王悅爲太保徐州刺史北海
王顥坐貪汙削爵除官是歲宕昌庫莫奚國並遣使朝貢
五年春正月辛丑祀南郊三月沃野鎮人破六韓拔陵反聚衆殺
鎮將號真王元年夏四月高平酋長胡琛反自稱高平王攻鎮以
應拔陵別將盧祖遷擊破之五月都督北征諸軍事臨淮王彧攻
討敗於五原削除官爵壬申詔尚書令季崇爲大都督率廣陽王

深等北討六月秦州城人莫折大提據城反自稱秦王殺刺史李
彥大提尋死子念生代立僭稱天子年號天建置立百官丁酉大
赦秋七月戊午復河間王琛臨淮王彧本封是月涼州幢帥于菩
提呼延雄執刺史宋穎據州反念生遣其兄高陽王天生下隴東
寇八月甲午雍州刺史元志西討大敗於隴東退守岐州景申詔
諸州鎮軍元非犯配者悉免為編戶改鎮為州依舊立稱九月壬
申詔尚書左僕射齊王蕭寶寅為西道行臺大都督復撫軍北海
王顥官爵為都督並率諸將西討乙亥帝幸明堂餞寶寅等吐谷
渾主伏連籌遣兵討涼州于菩提走追斬之城人趙天安復推宋
穎為刺史冬十月營州城人劉安定就德興據城反執刺史李仲
遵城人王惡兒斬定安以降德興東走自號燕王十二月詔太傅
京兆王繼為太師大將軍率諸將西討汾州正平平陽胡叛逆詔

復征東將軍章武王融封爵為大都督率眾討之莫折念生遣兵
攻涼州城人趙天安復執刺史以應之是歲噉噠契丹地豆干庫
莫奚等國並遣使朝貢

孝昌元年春正月庚申徐州刺史元法僧據城反自稱宋王年號
天啓遣其子景仲歸梁梁遣其將豫章王綜入守彭城法僧擁其
僚屬南入詔臨淮王彧尚書李憲為都督安豐王延明為東道行
臺俱討徐州癸亥蕭寶寅及征西將軍崔延伯大破賊於黑水天
生退走入隴涇歧及隴悉平以太師大將軍京兆王繼為太尉二
月詔復故樂良王長命爵以其子忠紹之戊戌大赦三月甲戌
詔五品以上各薦所知夏四月辛卯皇太后復臨朝攝政引群臣
面陳得失壬辰征西將軍都督崔延伯大敗於涇川戰歿六月癸
未大赦改元蠕蠕主阿那瓌大破拔陵是月諸將逼彭城蕭綜夜

潛出降梁諸將奔退衆軍追躡免者十二秋八月癸酉詔斷遠近
貢獻珍麗違者免官柔玄鎮人杜洛周反於上谷年號真王九月乙
卯詔減天下諸調之半壬戌詔五品以上各舉所知辛未曲赦南北
秦州冬十月蠕蠕遣使朝貢十一月辛亥詔父母年八十以上者皆
聽居官時四方多事諸蠻復反十二月山胡劉彥昇反自稱天子
二年春正月庚戌封廣平王懷長子誨爲范陽王壬子以太保汝
南王悅領太尉是月五原鮮于修禮反於定州年號魯興二月庚
申帝及皇太后臨太夏門親覽寃訟三月庚子追復中山王熙本
爵以其子叔仁紹之夏四月大赦戊申北討都督河間王琛長孫
承業失利奔還詔並免官爵五月丁未車駕將北討內外戒嚴前
給事黃門侍郎元略自梁還朝封義陽王以丞相高陽王雍爲大
司馬六月己巳曲赦齊州絳蜀陳雙熾聚衆反自號始建王曲赦

平陽建興正平三郡詔假鎮西將軍都督長孫承業討雙熾平之
景子改封義陽王略爲東平王戊寅詔復京兆王維本封江陽王
戊子詔曰自運屬艱棘歷載於茲朕威德不能遐被經略無以及
遠何以苟安黃屋無愧黔黎今便避居正殿蔬飧素服當親自招
募收集忠勇其有直言正諫之士敢決徇義之夫二十五日悉集
華林東門人別引見共論得失秋八月景子進封廣川縣公元邵
爲常山王戊子進武城縣公子攸爲長樂王癸巳賊帥元洪業斬
鮮于修禮請降爲賊黨葛榮所殺五月辛亥葛榮敗都督廣陽王
深章武王融於博野白牛邏融歿於陣榮自稱天子國號齊年稱
廣安冬十一月戊戌杜洛周攻陷幽州執刺史王延年及行臺常
景景午稅京師田租畝五升借賃公田者畝一斗閏月稅市人出
入者各一錢店舍爲五等梁將元樹逼壽春揚州刺史李憲力屈

而降初留州縣及長史司馬戍主副質子於京師詔頃舊京淪覆
中原喪亂宗室子女屬籍其七廟內爲雜戶濫門拘辱者悉聽離
絕是歲疊伏羅庫國並遣使朝貢

三年春正月甲戌以司空皇甫度爲司徒儀同三司蕭寶寅爲司
空辛巳葛榮陷殷州刺史崔楷固節死之甲申詔峻鑄錢之制蕭
寶寅大敗于涇州北海王顥尋亦敗走曲赦關西及正平平陽建
興戊子以司徒皇甫度爲太尉己丑以四方未平詔內外戒嚴將
親征二月丁酉詔開輸賞格輸粟入瀛定岐雍四州者官斗二百
斛賞一階入二華州者五百石賞一階不限多少粟畢授官虜賊
據潼關三月甲子詔將西討中外戒嚴虜賊走復潼關秋七月相
州刺史安樂王鑒據州反己丑大赦八月都督源子邕李神軌裴
衍攻鄴丁未斬鑒相州平九月己未東豫州刺史元慶和以城南

叛秦州城人杜粲殺莫折念生自行州事冬十月戊申曲赦恒農
巴西河北正平平陽邵郡及關西諸州軍甲寅雍州刺史蕭寶寅
據州反自號齊年稱隆緒十一月己丑葛榮攻陷冀州執刺史元
浮逐出居人凍死者十六七十二月戊申都督源子邕裴衍與榮
戰敗於陽平東北並歿是月杜粲爲駱超所殺超遣使歸罪是歲
蠕蠕遣使朝貢

武泰元年春正月乙丑生皇女祕言皇子景寅大赦改元丁丑雍
州人侯終德相率攻蕭寶寅寶寅度渭走雍州平二月癸巳帝崩
於顯陽殿時年十九甲寅皇子卽位大赦皇太后詔曰皇家握曆
受圖年將二百祖宗累聖社稷載安高祖以文思先天世宗以下
武繼世大行在御重以寬仁奉養率由溫明恭順實望穹靈降祐
麟趾衆繁自潘充華有孕椒宮冀誕儲兩而熊羆無兆唯虺遂彰

于時直以國步未康假稱統胤欲以底定物情係仰宸極何圖一
旦弓劔莫追皇曾孫故臨洮王寶暉世子釗體自高祖天表卓異
大行平日養愛特深義齊若子事符當璧允膺大寶即日踐祚可
班宣遠邇咸使知之乙卯幼主卽位儀同三司大都督尔朱榮抗
表請入奔赴勒兵而南是月杜洛周爲葛榮所并三月甲申上尊
謚曰孝明皇帝乙酉葬於定陵廟號肅宗四月戊戌尔朱榮濟河
庚子皇太后幼主崩

論曰宣武承聖考德業天下想望風化垂拱無爲邊徼稽服而寬
以攝下從容不斷太和之風替矣比之漢世安順宣武之後繼以
元成孝明冲齡統業靈后婦人專制任用非人賞罰乖舛於是興
起宇內禍延邦畿卒享國不長抑亦淪胥之始也

北史卷四

魏本紀第四

終

魏本紀第四

北史卷五

魏本紀第五

魏本紀第五

敬宗孝莊皇帝諱子攸彭城王勰之第三子也母曰李妃明帝初
以勰有魯陽翼衛之勲封帝武城縣公幼侍明帝書於禁中及長
風神秀慧姿貌甚美雅爲明帝親待孝昌二年八月進封長樂王
歷位侍中中軍將軍以兄彭城王劭事轉爲衛將軍左光祿大夫
中書監實見出也武泰元年二月明帝崩大都督尔朱榮謀廢立
以帝家有忠勲且兼人望陰與帝通率衆來赴帝與兄弟夜北度
河會榮於河陽

未安元年夏四月戊戌帝南濟河卽皇帝位以皇兄彭城王劭爲
無上王皇弟霸城公子正爲始平王以尔朱榮爲使持節侍中都
督中外諸軍事大將軍尚書令領軍將軍領左右封太原王己亥

百僚相率有司奉璽綬備法駕奉迎於河梁西至陶渚榮以兵權
在已遂有異志乃害靈太后及幼主次害無上王劭始平王子正
又害丞相高陽王雍已下王公卿士二千人列騎衛帝遷於便幕
榮尋悔稽顙謝罪辛丑車駕入宮御太極殿大赦改武泰爲建義
元年壬寅榮表請追謚無上王爲皇帝餘死河陰者諸王刺史贈
三司三品者令僕五品者刺史七品以下及庶人郡鎮諸死者子
孫聽立後授封爵詔從之癸卯以前太尉江陽王繼爲太師以司
州牧相州刺史北海王顥爲太傅開府仍刺史封光祿大夫清泉
縣侯李延實爲陽平王位太保遷太傅以并州刺史元大穆爲大
尉封上黨王以儀同三司楊椿爲司徒以儀同三司頃丘郡公穆
紹爲司空領尚書令進爵爲王以雍州刺史長孫承業爲開府儀
同三司進封馮翊王以殿中尚書元諶爲尚書右僕射封魏郡王

以給事黃門侍郎元瑱爲東海王甲辰以敷城王坦爲咸陽王以
諫議大夫元貴平爲東萊王以直閤將軍元肅爲魯郡王以祕書
郎中元曄爲長廣王以馮翊郡公源紹景復先爵隴西王扶風郡
公馮冏東郡公陸子彰北平公長孫悅並復先王爵以北平王超
還復爲安定王丁未詔中外解嚴庚戌封大將軍尔朱榮次子义
羅爲梁郡王詔蠕蠕王阿那瓌讚拜不名上書不稱臣是月汝南
王悅北海王顥臨淮王彧前後奔梁五月丁巳朔以右僕射元羅
爲東道大使光祿勳元欣副之循方黜陟先行後聞辛酉大將軍
尔朱榮還晉陽帝餞於邗除六月癸卯以高昌王世子光爲平西將
將軍瓜州刺史襲爵泰臨縣伯高昌王帝以寇難未夷避正殿責
躬撤膳又班募格收集忠勇有直言正諫之士者集華林園面論
時事幽州平北府主薄河間邢杲率河北流移人萬餘戶反於北

海自署漢王年號天統秋七月乙丑加大將軍尔朱榮柱國大將軍錄尚書事壬子光州人劉舉聚眾反於濮陽自稱皇武大將是月高平鎮人萬俟醜奴僭稱大位臨淮王彧自江南還朝八月泰山太守羊侃據郡反甲辰詔大都督宗正珍孫討劉舉平之九月己巳以齊州刺史元欣爲沛郡王壬申柱國大將軍尔朱榮率騎七千討葛榮於滏口破禽之冀定滄瀛殷五州平乙亥以葛榮平大赦改元爲末安辛巳以尔朱榮爲大丞相進榮子平昌郡公文殊昌樂郡公文暢爵並爲王以司徒楊椿爲太保城陽王徽爲司徒冬十月丁亥尔朱榮檻送葛榮於京師帝臨闔闔門榮稽顙謝罪斬於都市戊戌江陽王繼薨癸丑復膠東縣侯李侃希祖爵南郡王是月大都督費穆大破梁軍禽其將曹義宗檻送京師梁以北海王顥爲魏主年號孝基入據南兗之鉅城十一月戊午以無

上王世子韶爲彭城王陳留王子寬爲陳留王寬弟剛爲浮陽王剛弟質爲林慮王癸亥行臺于暉等大破羊侃於瑕丘侃奔梁戊寅封前軍元凝爲東安王是歲葛榮遺黨韓樓復據幽州反二年春二月甲午追尊皇考爲文穆皇帝廟號肅祖皇妣爲文穆皇后夏四月癸未遷文穆皇帝及文穆皇后神主于太廟降畿內死罪已下刑辛丑上黨王天穆大破邢杲於濟南杲降送赴京師斬於都市五月壬子朔元顥尅梁國乙丑內外戒嚴癸酉元顥陷滎陽甲戌夜車駕北巡乙亥幸河内景子元顥入洛丁丑進封城陽縣公元祉爲平原王安昌縣公元鷲爲華山王戊寅太原王尔朱榮會車駕於長子卽日反旆上黨王天穆北度會車駕於河内秋七月戊辰都督尔朱兆賀拔勝從硤石夜濟破顥子冠受及安豐王廷明軍元顥敗走庚午車駕入居華林園升大夏門大赦壬

申以柱國大將軍太原王尔朱榮爲天柱大將軍癸酉臨穎縣卒
江豐斬元顥傳首京師甲戌以大將軍上黨王天穆爲太宰以司徒
城陽王徽爲大司馬太尉己卯以南青州刺史元旭爲襄城王南兗
州刺史元暹爲汝陽王閏月辛巳帝始居宮內辛卯以兼吏部尚書
楊津爲司空八月己未以太傅李延實爲司徒丁卯封瓜州刺史元
大宗爲東陽王九月大都督侯深破韓樓於薊斬之幽州平冬十月
乙酉朔日有蝕之丁丑以前司空丹楊王蕭贊爲司徒十一月己
卯就德興自滎州遣使請降景午以大司馬太尉城陽王徽爲太
保以司徒丹楊王蕭贊爲太尉以雍州刺史長孫承業爲司徒
三年夏四月丁卯雍州刺史尔朱天光討萬俟醜奴蕭寶寅於安
定破禽之囚送京師甲戌以關中平大赦斬醜奴於都市賜寶寅
死六月戊午嘸嗟國獻師子一是月白馬龍涸胡王慶雲僭

號於朮洛城秋七月景子尔朱天光平朮洛城禽慶雲九月辛卯
天柱大將軍尔朱榮上黨王天穆自晉陽來朝戊戌帝殺榮天穆
於明光殿及榮子菩提乃升閭闔門大赦遣武衛將軍奚毅前燕
州刺史侯深率衆鎮北中是夜左僕射尔朱世隆榮妻鄉郡長公
主率榮部曲自西陽門出屯河陰己亥攻河橋禽毅等屠害之據
北中城南逼京師冬十月癸卯朔封大鴻臚卿寶炬爲南陽王汝
陽縣公修爲平陽王新陽伯誕爲昌樂王琅即公昶爲太原王甲
辰徙封魏郡王諶爲趙郡王諶弟子趙郡王宣爲平昌王戊申皇
子生大赦乙卯通直散騎常侍李苗以火船焚河橋尔朱世隆退
走壬申世隆停建興之高都尔朱兆自晉賜來會之共推長廣王
曄爲主大赦所部年號建明徐州刺史尔朱仲遠反率衆向京師
十一月己亥以司徒長孫承業爲太尉以臨淮王彧爲司徒景子

進雍州刺史廣宗郡公朱天光爵爲王十二月甲辰朱兆余
朱度律自富平津上率騎涉度以襲京城事出倉卒禁衛不守帝
步出雲龍門兆逼帝幸永寧寺殺皇子亂兵煞司徒臨淮王彧左
僕射范陽王誨戊申朱度律自鎮京師甲寅朱兆遷帝於晉
陽甲子帝遇弑於城內三級佛寺時年二十四并害陳留王寬中
興二年廢帝奉謚爲武懷皇帝及孝武立又以廟諱故改謚孝莊
皇帝廟號敬宗葬靜陵

節閔皇帝諱恭字修業廣陵惠王羽之子也母曰王氏帝少有志
度事祖母嫡母以孝聞正始中襲爵位給事黃門侍郎帝以元義
擅權託稱瘖病絕言垂一紀居於龍花佛寺無所交通永安末有
白莊帝言帝不語將有異圖人間遊聲又云常有天子氣帝懼禍
遂逃匿上洛尋見追躡送京師拘禁多日以無狀獲免及莊帝崩

朱世隆等以元暉疎遠又非人望所推以帝有過人之量將謀
廢立恐實不語乃令帝所親申意兼迫帝曰天何言哉世隆等
大悅及元暉至邛南世隆等奉帝東郭外行禪讓禮太尉朱度
律奉路車進璽紱服哀冕百官侍衛入自建春雲龍門

普泰元年春二月己巳皇帝卽位於太極前殿羣臣拜賀禮畢遂
登闔闔門大赦以魏爲大魏改建明二年爲普泰元年罷稅市及
稅鹽之官庚午詔曰自秦之末競爲皇帝忘負乘之深殃垂貪鄙
於萬葉予今稱帝已爲衰矣可普告令知是月鎮遠將軍清河崔
祖螭聚青州七郡之衆圍東陽幽州刺史劉靈助起兵於薊河北
大使高乾及其弟昂夜襲冀州執刺史元疑共推前河內太守封
隆之行州事三月癸酉封長廣王曄爲東海王以青州刺史魯郡
王肅爲太師沛郡王欣爲太傅司州牧改封淮陽王以徐州刺史

彭城王余朱仲遠雍州刺史隴西王余朱天光並爲大將軍以柱
國大將軍并州刺史潁川王余朱兆爲天柱大將軍封晉州刺史
平陽郡公高歡爲勃海王以特進清河王亶爲太傅以尚書令樂
平王余朱世隆爲太保以趙郡王湛爲司空景申定州刺史侯深
破劉靈助於安國城斬之傳首京師夏四月壬子享太廟癸酉隴
西王余朱天光破宿勒明達禽送京師斬之景寅以侍中余朱彥
伯爲司徒詔有司不得復稱僞梁罷細作之條無禁隣國還往五
月景子余朱仲遠使其都督魏僧勗等討崔祖螭於東陽斬之六
月己亥朔日有蝕之庚申勃海王高歡起兵信都以誅余朱氏爲
名秋七月壬申余朱世隆等害前太保楊椿前司空楊津景戌司
徒余朱彥伯以早遜位九月以彭城王余朱仲遠爲太宰庚辰以
隴西王余朱天光爲大司馬癸巳追尊皇考爲先帝皇妣王氏爲

先太妃封皇弟永業爲高密王皇子子恕爲勃海王冬十月壬寅
高歡推勃海太守元朗卽皇帝位於信都

二年春閏二月高歡敗余朱天光等於韓陵夏四月辛巳高歡與
廢帝至芒山使魏蘭根慰喻洛邑且觀帝之爲人蘭根忌帝雅德
還致毀謗竟從崔陵議廢帝於崇訓佛寺而立平陽王修是爲孝
武帝帝旣失位乃賦詩曰朱門久可患紫極非倩翫顛覆立可待
一年三易換時運正如此唯有修真觀五月景申帝遇弒殂於門
下外省時年三十五孝武帝詔百司赴會葬用王禮加九旒鑾輅
黃屋左纛班劔百二十人後西魏追謚節閔皇帝
廢帝諱朗字仲哲章武王融第三子也母曰程氏帝少稱明悟元
曄建明二年正月戊子爲勃海太守普泰元年十月勃海王高歡
奉帝以主號令

中興元年冬十月壬寅皇帝卽位於信都西大赦改普泰元年爲中興以勃海王高歡爲丞相都督中外諸軍事以河北大使高乾爲司空辛亥高歡大破余朱兆於廣阿十一月梁將元樹入據譙城

二年春二月甲子以勃海王高歡爲大丞相柱國大將軍太師及歡敗余朱氏於韓陵四月辛巳帝於河陽遜位於別邸五月孝武封帝爲安定郡王十一月殂於門下外省時年二十永熙二年葬於鄴西南野馬崗

孝武皇帝諱修字孝則廣平武穆王懷之第三子也母曰李氏帝性沈厚學涉好武事遍體有鱗文年十八封汝陽縣公夢人有從諱謂已曰汝當大貴得二十五年未安三年封平陽王晉泰中爲侍中尚書左僕射中興二年高歡旣敗余朱氏廢帝自以疎遠請

遜大位歡乃與百寮議以孝文不可無後時召汝南王悅於梁至將立之宿昔而止又諸王皆逃匿帝在田舍先是嵩山道士潘彌望見洛陽城西有天子氣候之乃帝也於是造第密言之居五旬而高歡使斛斯椿求帝椿從帝所親王思政見帝帝變色曰非賣我耶椿遂以白歡歡遣四百騎奉迎帝入氊帳陳誠泣下霑襟讓以寡德歡再拜帝亦拜歡出備服御進湯沐達夜嚴警昧爽文武執鞭以朝使斛斯椿奉勸進表椿入帷門罄折延首而不敢前帝令思政取表曰視便不得不稱朕矣於是假廢帝安定王詔策而禪位焉卽位于東郭之外用代都舊制以黑氊蒙七人歡居其一帝於氊上西向拜天訖自東陽雲龍門入

永熙元年夏四月戊子皇帝御太極前殿羣臣朝賀禮畢升闔闔門大赦改中興二年爲太昌元年壬辰高歡還鄴五月景申節閔

帝殂以太傅淮陽王欣爲太師改封沛郡王以司徒趙郡王諶爲
太保以司空南陽王寶炬爲太尉以太保長孫承業爲太傅辛丑
復前司空高乾位己酉以儀同三司清河王亶爲司徒乙卯內外
解嚴六月癸亥朔帝於華林園納訟丁卯南陽王寶炬坐事降爲
驃騎大將軍開府以王歸第己卯臨顯陽殿納訟景戌詔曰間者
凶權誕恣法令變常遂立夷貊輕賦冀收天下之意隨以箕歛之
重終納十倍之征掩目捕雀何能過此今歲租調且兩收一丐明
年復舊秋七月庚子以南陽王寶炬爲太尉乙卯帝臨顯陽殿親
理冤獄是月東南道大行臺樊子鵠大破梁軍於譙城禽其將元
樹八月丁卯封西中郎將元寧爲高平王九月癸卯進燕郡公賀
拔允爵爲王癸丑改封沛郡王欣爲廣陵王節閔子勃海王子恕
爲沛郡王冬十月辛酉朔日有蝕之十一月丁酉祀圓丘甲辰殺

安定王朗及東海王曄己酉以汝南王悅爲侍中大司馬開府葬
太后胡氏十二月丁亥殺大司馬汝南王悅大赦改元爲永興以
同明元時年號尋改爲永熙是歲蠕蠕嚙噠高麗契丹庫莫奚高
昌等國並遣使朝貢

二年春正月庚寅朔朝饗羣臣于太極前殿丁酉勃海王高歡大
敗余朱氏山東平罷諸行臺丁巳追尊皇考爲武穆皇帝太妃馮
氏爲武穆皇后皇妣李氏曰皇太妃二月以咸陽王坦爲司空三
月甲午太師魯郡王肅薨丁巳以太保趙郡王諶爲太尉以太尉
南陽王寶炬爲尚書令太保開府是月阿至羅十萬戶內附詔復
以勃海王高歡爲大行臺隨機裁處夏四月己未朔日有蝕之秋
七月壬辰以太師廣陵王欣爲大司馬以太尉趙郡王諶爲太師
並開府庚辰以前司徒燕郡王賀拔允爲太尉冬十月癸未以衛

將軍瓜州刺史泰臨縣伯高昌王趙子堅爲儀同三司進爵郡公
十二月丁巳狩於嵩陽王卒寒苦已巳遂幸溫湯丁丑還宮

三年春二月壬戌大赦壬午封左衛將軍元斌之爲潁川王夏四
月癸丑朔日有蝕之辛未高平王靈坐事降爵爲公五月景戌置
勲府庶子箱別六百人騎官箱別二百人閤內部曲數千人帝內
圖高歡乃以斛斯椿爲領軍使與王思政等統之以爲心膂軍謀
朝政咸決於椿分置督將及河南關西諸刺史辛卯下詔戒嚴揚
聲伐梁寶謀北討是夏契丹高麗吐谷渾並遣使朝貢秋七月己
丑帝親總六軍十餘萬次河橋高歡引軍東度景午帝率南陽王
寶炬清河王亶廣陽王湛斛斯椿以五千騎宿於漣西楊王別舍
沙門都維那惠臻負壘持千牛刀以從有牛百頭盡殺以食軍士
衆知帝將出其夜亡者過半清河廣陽二王亦逃歸略陽公宇文

泰遣都督駱超李賢和各領數百騎赴駱超先至甲戌賢和會帝
於嶠中己酉高歡入洛遣婁昭及河南尹元子思領左右侍官追
帝請迴駕高昂率勁騎及帝於陝西帝鞭馬長驚至湖城饑渴甚
有王思村人以麥飯壺漿獻帝帝甘之復一村十年是歲二月榮
惑入南斗衆星北流羣鼠浮河向鄴梁武跣而下殿以禳星變及
聞帝之西慚曰虜亦應天平帝至稠桑潼關大都督毛洪賓迎獻
食八月宇文泰遣大都督趙貴梁禦甲騎二千來赴乃奉迎帝過
河謂禦曰此水東流而朕西上若得重謁洛陽廟是卿等功也帝
及左右皆流涕宇文泰迎帝於東陽帝勞之將士皆呼萬歲遂入
長安以雍州公廨爲宮大赦甲寅高歡推司徒清河王亶爲大司
馬承制總萬機居尚書省歡追車駕至潼關九月己酉歡東還洛
陽帝親督衆攻潼關斬其行臺華長瑜又尅華州其冬十月高歡

推清河王亶子善見爲主徙都鄴是爲東魏魏於此始分爲二帝
之在洛也從妹不嫁者三一曰平原公主明月南陽王同產也二
曰安德公主清河王懌女也三曰蒺藜亦封公主帝內宴令諸婦
人詠詩或詠鮑照樂府曰朱門九重門九閨願逐明月入君懷帝
旣以明月入關蒺藜自縊宇文泰使元氏諸王取明月殺之帝不
悅或時彎弓或時推案君臣由此不安平閏十二月癸巳潘彌奏
言今日當甚有急兵其夜帝在逍遙園宴阿至羅顛侍臣曰此處
彷彿華林園使人聊增悽怨命取所乘波斯騮馬使南陽王躍之
將攀鞍蹶而死帝惡之日晏還宮至後門馬驚不前鞭打入謂潘
彌曰今日幸無他不彌曰過夜半則大吉須臾帝飲酒遇醜而崩
時年二十五謚曰孝武殯於草堂佛寺十餘年乃葬雲陵始宣武
孝武明間謠曰狐非狐貉非貉焦梨狗子齧斷索識者以爲索謂

本索髮集梨狗子指宇文泰俗謂之黑獺也

文皇帝諱寶炬孝文皇帝之孫京兆王愉之子也母曰楊氏帝正
始初坐父愉罪兄弟皆幽宗正寺及宣武崩乃得雪正光中拜直
閣將軍時胡太后多嬖寵帝與明帝謀誅之事泄免官武泰中封
邵縣侯永安三年進封南陽王孝武卽位拜太尉加侍中永熙二
年進位太保開府尚書令三年孝武與高歡構難以帝爲中軍四
面大都督及從入關拜太宰錄尚書事孝武崩丞相略陽公宇文
泰率羣公卿士奉表勸進三讓乃許焉

大統元年春正月戊申皇帝卽位於城西大赦改元追尊皇考爲
文景皇帝皇妣楊氏爲皇后己酉進丞相略陽公宇文泰都督中
外諸軍錄尚書事大行臺改封安定郡公以尚書令斛斯椿爲太
保廣平王贊爲司徒乙卯立妃乙氏爲皇后立皇子欽爲皇太子

甲子以廣陵王欣爲太傅以儀同三司万俟壽樂干爲司空東魏將侯景攻陷荊州二月前南青州刺史大野拔斬兗州刺史樊子鵠以州降東魏夏四月降罪人加安定公宇文泰位柱國秋七月以開府儀同三司念賢爲太尉以司空万俟壽樂干爲司徒以開府儀同三司越勒肱爲司空梁州刺史元羅以州降梁九月有司詔煎御香澤須錢萬貫帝以軍旅在外停之冬十月太師上黨王長孫承蕘十二月以太尉念賢爲太傅以河州刺史梁景獻爲太尉

二年春正月辛亥祀南郊改以神元皇帝配東魏攻陷夏州二月儀同三司段敬討叛羌梁合定平之三月以涼州刺史李叔仁爲司徒以司徒万俟壽樂干爲太宰夏五月司空越勒肱薨秦州刺史建中王万俟普撥及其子太宰壽樂干率所部奔東魏秋九月

以扶風王孚爲司空以太保斛斯椿爲太傅冬十一月追改始祖神元皇帝爲太祖道武皇帝爲烈祖是歲關中大饑人相食死者十七八

三年春二月槐里獲神璽大赦夏四月太傅斛斯椿薨五月以廣陵王欣爲太宰賀拔勝爲太師六月以司空扶風王孚爲太保以太尉梁景獻爲太傅以司徒廣平王贊爲大尉以開府儀同三司王盟爲司空冬十月安定公宇文泰大破東魏軍於沙苑拜泰柱國大將軍十二月司徒李叔仁自梁州通使於東魏建昌太守賀蘭植攻斬之

四年春正月辛酉拜天於清暉室終帝世遂爲常二月東魏攻陷南汾潁豫廣四州廢皇后乙氏三月立蠕蠕女郁久閭氏爲皇后大赦以司空王盟爲司徒秋七月東魏將侯景等圍洛陽帝與安

定公宇文泰東伐九月車駕至自東伐以撫軍將軍梁合定爲南
洮州刺史安西蕃

五年春二月赦京城內夏五月以開府儀同三司李弼爲司空免
妓樂雜役之徒皆從編戶秋七月詔自今恒以朔望親閱京師見
禁囚徒以司空扶風王孚爲太尉冬十月於陽武門外縣鼓置紙
筆以求得失

六年春正月庚戌朝羣臣自西遷至此禮樂始備太尉扶風王孚
薨二月鑄五銖錢降罪人冬十一月太師念賢薨

七年春二月幽州刺史順陽王仲景以罪賜死三月夏州刺史劉
平謀反大都督于謹討禽之秋九月詔班政事之法六條冬十一
月叛羌梁合定徒黨屯於赤水城秦州刺史獨狐信擊平之尚書
奏班十二條制十二月御憑雲觀引見諸王叙家人之禮手詔爲

宗誠十條以賜之

八年春三月初置六軍夏四月鄯善王兄鄯朱那率衆內附秋八
月以太尉王盟爲太保冬十月詔皇太子鎮河東十二月行幸華
州起萬壽殿於沙苑北

九年春正月降罪人禁中外及從母兄弟姊妹爲婚閏月車駕至
自華州二月東魏北豫州刺史高仲密據武牢內附以仲密爲侍
中司徒封勃海郡公秋七月大赦以太保王盟爲太傅以太尉廣
平王贊爲司空冬十二月以司空李弼爲太尉

十年春正月甲子詔公卿已下每月上封事三條極言得失刺史
二千石銅墨已上有讜言嘉謀勿有所諱夏五月太師賀拔勝薨
秋七月更權衡度量

十一年夏五月太傅王盟薨詔諸鞫大辟獄皆命三公覆審然後

加刑冬始築圓丘於城南封皇子儉

十二年春二月涼州刺史宇文仲和反秦州刺史獨孤信討平之三月鑄五銖錢夏五月詔女年不滿十三以上勿得以嫁秋九月東魏勃海王高歡攻玉壁晉州刺史韋孝寬力戰禦之冬十二月歡燒營而退

十三年春正月開白渠以溉田二月詔自今應官刑者直沒官勿刑亡奴婢應黥者止科亡罪以開府儀同三司若干惠爲司空東魏勃海王高歡薨其司徒侯景據潁川率河南六州內附授景太傅河南大行臺上谷郡公三月大赦夏五月以太傅侯景爲大將軍以開府儀同三司獨孤信爲大司馬晉王謹薨秋七月司空若干惠薨大將軍侯景據豫州叛封皇子寧爲趙王

十四年春正月赦潁豫廣北洛東荆襄等七州以開府儀同三司

趙貴爲司空皇孫生大赦夏五月以安定公宇文泰爲太師廣陵王欣爲太傅太尉李弼爲太宗伯前太尉趙貴爲大司寇以司空干謹爲大司空

十五年己巳五月侯景殺梁武帝初詔諸代人太和中改姓者並令復舊六月東魏勃海王高澄攻陷潁川秋八月盜殺東魏勃海王高澄冬十二月封雍州刺史岳陽王簫簪爲梁王

十六年夏四月封皇子儒爲燕王公爲吳王五月東魏靜帝遜位於齊秋七月安定公宇文泰東伐至恒農齊師不出乃還九月大赦

十七年春三月庚戌帝崩于乾安殿時年四十五夏四月庚辰葬於永陵上謚曰文皇帝帝性强果始爲太尉時侍中高隆之恃勃海王高歡之黨驕狎公卿因公會帝勸酒不飲怒而歐之曰鎮兵

兵何敢尔也孝武以歡故免帝太尉歸第命羽林守衛月餘復位及歡將改葬其父朝廷追贈太師百僚食吊者盡拜帝獨不屈曰安有生三公而拜贈太師耶及躋大位權歸周室嘗登逍遙觀望嵯峨山因謂左右曰望此令人有脫屣之意若使朕年五十便委政儲宮尋山餌藥不能一日萬機也既而大運未終竟保天祿云廢帝諱欽文皇帝之長子也母曰乙皇后大統元年正月乙卯立爲皇太子十七年三月卽皇帝位是月梁邵陵王蕭綸侵安陸大將軍楊忠討禽之

元年冬十一月梁湘東王蕭繹討侯景禽之遣其舍人魏彥來告仍嗣位于江陵

二年秋八月大將軍尉遲迥尅成都劔南平冬十一月安定公宇文泰殺尚書元烈

三年春正月安定公宇文泰廢帝而立齊王廓帝自元烈之誅有怨言淮安王育廣平王贇等並垂泣諫帝不聽故及於辱

恭皇帝諱廓文皇之第四子也大統十四年封爲齊王廢帝三年正月卽皇帝位改元

元年夏四月蠕蠕乙旃達官寇廣武五月柱國李弼追擊之斬首數千級收輜重而還冬十一月魏師滅梁戕梁元帝梁太尉王僧辯奉元帝子方智爲王承制居建業

二年秋七月梁太尉王僧辯納貞陽侯蕭明於齊奉以爲主梁王方智爲太子九月梁司空陳霸先殺僧辯廢蕭明復奉方智爲帝是歲梁廣州刺史王琳寇邊大將軍豆虜寧帥師討之

三年春正月丁丑初行周禮建六官以安定公宇文泰爲太師冢宰以柱國李弼爲大司徒趙貴爲太保大宗伯以尚書令獨孤信

爲大司馬以于謹爲大司寇以侯莫陳崇爲大司空冬十月乙亥安定公宇文泰薨十二月庚子帝遜位於周

周閔帝元年正月封帝爲宋公尋殂

東魏孝靜皇帝諱善見清河文宣王亶之世子也母曰胡妃永熙三年八月拜開府儀同三司孝武帝旣入關勃海王高歡乃與百僚會議推帝以奉明帝之後時年十一

天平元年冬十月景寅皇帝卽位于城東北大赦改元庚午以大師趙郡王湛爲大司馬以司空咸陽王坦爲太尉以開府儀同三司高盛爲司徒以開府儀同三司高昂爲司空壬申享太廟景子車駕北遷于鄴詔勃海王高歡留後部分改司州爲洛州以尚書令元弼爲儀同三司洛州刺史鎮洛陽十一月兗州刺史樊子鵠南青州刺史大野拔據瑕丘反庚寅車駕至鄴居北城相州之廨

改相州刺史爲司州牧魏郡太守爲魏尹徙鄴舊人西徑百里以居新遷人分鄴置臨漳縣以魏郡林慮廣平陽丘汲郡黎陽東濮陽清河廣宗等郡爲皇畿十二月丁卯燕郡王賀拔允薨庚午詔內外戒嚴百司悉依舊章從容雅服不得以務衫從事景子進侍中封隆之等五人爲大使巡喻天下丁丑赦畿內閏月梁以元慶和爲魏王入據平瀨鄉孝武崩于長安初置四中郎將於礪石橋置東中蒲泉置西中濟北置南中洛水置北中

二年春正月乙亥兼尚書右僕射東南道行臺元晏討元慶和破走之二月壬午以太尉咸陽王坦爲太尉以司州牧西河王恂爲太尉己丑前南青州刺史大野拔斬樊子鵠以降兗州平戊戌梁司州刺史陳慶之寇豫州刺史堯雄擊走之三月辛酉以司徒高盛爲太尉以司空高昂爲司徒濟陰王暉業爲司空渤海王高歡

討平山胡劉蠡升辛未以旱故詔京邑及諸州郡縣收瘞骸骨是
春高麗契丹並遣使朝貢夏四月前青州刺史侯梁反攻掠青齊
癸未濟州刺史蔡雋討平之壬辰降京師見囚夏五月大旱勤城
門殿門及省府寺署坊門澆人不簡王公無限日得雨乃止六月
元慶和寇南頓豫州刺史堯雄大破之秋七月甲戌封汝南王悅
孫綽爲琅琊王八月辛卯司空濟陰王暉業坐事免甲午發衆七
萬六千人營新宮九月丁巳以開府儀同三司襄城王旭爲司空
冬十月丁未梁柳仲禮寇荊州刺史王元擊破之癸丑祀圓丘甲
寅閭闔門災龍見并州人家井中十二月壬午車駕狩于鄴東甲
午文武百官量事各給祿是歲西魏文帝大統元年也
三年春正月癸卯朔饗羣臣於前殿戊申詔百官舉士舉不稱才
者兩免之二月丁未梁光州刺史郝樹以州內附丁酉加勃海王

世子澄爲尚書令大行臺大都督三月甲寅以開府儀同三司華
山王鷲爲大司馬丁卯陽夏太守盧公纂據郡南叛大都督元整
破之夏四月丁酉昌樂王誕薨五月癸卯賜鰥寡孤獨貧窮者衣
物各有差景辰以錄尚書事西河王恂爲司州牧戊辰太尉高盛
薨六月辛巳趙郡王湛薨秋七月庚子大赦梁夏州刺史田獨鞞
潁川防城都督劉鸞慶並以州內附八月并肆涿建四州霜賈大
饒九月壬寅以定州刺史侯景兼尚書右僕射南道行臺節度諸
軍南討景辰平陽人路季禮聚衆反辛酉御史中尉竇泰討平之
冬十一月戊申詔遣使巡檢河北流移饒人侯景攻剋梁楚州獲
刺史桓和十二月以并州刺史尉景爲太保辛未遣使者板假老
人官百歲已下各有差壬申大司馬清河王亶薨癸未以太傅咸
陽王坦爲太師是歲高麗勿吉並遣使朝貢

四年春正月以汝南王暹為錄尚書事夏四月辛未遷七帝神主入新廟大赦內外百官普進一階先是滎陽人張儉等聚眾反於大魏山通西魏壬辰武衛將軍高元咸討破之六月己巳幸華林園理訟辛未詔尚書掩骼埋胔推錄囚徒壬午閭闔門災秋七月甲辰遣兼散騎常侍李楷聘於梁八月西魏尅陝州刺史李微伯死之九月侍中元子思與其弟子華謀西入並賜死閏月乙丑衛將軍右光祿大夫蔣天樂謀反伏誅禁京師酤酒冬十月以咸陽王坦為錄尚書事壬辰勃海王高歡西討敗于沙苑己酉西魏行臺宮景壽都督楊白駒寇洛州大都督韓賢大破之西魏又遣其大行臺元季海大都督獨孤信逼洛州刺史廣陽王湛棄城歸關季海信遂據金墉十一月景子以驃騎大將軍儀同三司万俟普為太尉十二月甲寅梁人來聘河間人邢磨納范陽人盧仲禮等

各聚眾反是歲高麗蠕蠕並遣使朝貢

元象元年春正月辛酉朔日有蝕之有巨象自至碭郡陵中南兗州獲送于鄴丁卯大赦改元二月景辰遣兼散騎常侍鄭伯猷聘于梁夏四月庚寅曲赦畿內開酒禁六月壬辰帝幸華林都堂聽訟秋七月乙亥高麗遣使朝貢是夏山東大水蝦蟆鳴于樹上秋八月辛卯大敗西魏于河陰九月大都督賀拔仁擊邢磨納盧仲禮等破平之冬十月梁人來聘十二月庚寅遣陸操聘于梁興和元年春正月辛酉以尚書令孫騰為司徒三月甲寅朔封常山郡王劭第二子曜為陳郡王五月甲戌立皇后高氏乙亥大赦是月高麗遣使朝貢六月乙酉以尚書左僕射司馬子如為山東黜陟大使尋為東北道行臺差選勇士庚寅前潁川刺史奚思業為河南大使簡發勇士丁酉梁人來聘戊申開府儀同三司汝陽

王暹薨秋八月壬辰遣兼散騎常侍王元景聘于梁九月甲子發畿內十萬人城鄴四十日罷辛未曲赦畿內死罪已下各有差冬十一月癸亥以新宮成大赦改元八十已上陽綾帽及杖七十旁無親及有疾廢者各有賜粟帛築城之夫給復一年

二年春正月壬申以太保尉景爲太傅以驃騎大將軍開府儀同三司庫狄干爲太保丁丑徙御新宮大赦內外百官並進一階營構主將別優一階二月乙卯梁人來聘夏五月己酉西魏行臺宮延和陝州刺史宮元慶率戶人屬置之河北馬場振廩各有差壬子遣兼散騎常侍李象聘于梁閏月丁丑朔日有蝕之己丑封皇兄景植爲宜陽王皇弟威爲清河王謙爲潁川王六月壬子大司馬華山王鷲薨冬十月丁未梁人來聘十二月乙卯遣兼散騎常侍崔長謙聘于梁是歲高麗蠕蠕勿吉並遣使朝貢

三年春二月甲辰阿至羅出吐拔那渾大率部來降三月乙酉梁州人公孫貴賓聚衆反自號天王陽夏鎮將討禽之夏四月戊申阿至羅國主副伏羅越君子去賓來降封爲高車王六月乙丑梁人來聘秋七月己卯宜陽王景植薨八月甲子遣兼散騎常侍李騫聘于梁先是詔羣官於麟趾閣議定新制冬十月甲寅班於天下己巳發夫五萬人築漳濱堰三十五日罷癸巳車駕狩于西山十一月戊寅還宮景戌以開府儀同三司彭城王韶爲太尉以度支尚書胡僧敬爲司空是歲蠕蠕高麗勿吉國並遣使朝貢四年春正月景辰梁人來聘夏四月景寅遣兼散騎常侍李繪聘于梁乙酉以侍中廣陽王湛爲太尉以尚書右僕射高隆之爲司徒以太尉彭城王韶爲錄尚書事丁亥太傅尉景坐事降爲驃騎大將軍開府儀同三司辛卯以太保庫狄干爲太傅以領軍將軍

婁昭爲大司馬封祖裔爲尚書右僕射六月景申復前侍中樂良
王忠爵丁酉復陳留王景皓常山王紹宗高密王承業爵秋八月
庚戌以開府儀同三司吏部尚書侯景爲兼尚書僕射河南行臺
隨機討防冬十月甲寅梁人來聘十一月壬午驃騎大將軍開府
儀同三司青州刺史西河王恹薨十二月辛亥使兼散騎常侍陽
裴使于梁是歲蠕蠕高麗吐谷渾並遣使朝貢

武定元年春正月壬戌朔大赦改元己巳車駕蒐于邯鄲之西山
癸酉還宮二月壬申北豫州刺史高仲密據武牢西叛三月景午
帝親納訟戊申勃海王高歡大敗西魏師于邙山追奔至恒農而
還豫洛二州平夏四月封彭城王韶弟襲爲武安王五月壬辰以
尅復武牢降天下死罪已下囚乙未以吏部尚書侯景爲司空六
月乙亥梁人來聘戊寅封前員外散騎侍郎元長春爲南郡王八

月乙丑以汾州刺史斛律金爲大司馬壬午遣兼散騎常侍李渾
聘于梁冬十一月甲午車駕狩于西山乙巳還宮是歲吐谷渾高
麗蠕蠕並遣使朝貢

二年春二月丁卯徐州人劉烏黑聚衆反遣行臺慕容紹宗討平
之三月梁人來聘以旱故宥死罪已下囚景午以開府儀同三司
孫騰爲太保壬子以勃海王世子高澄爲大將軍領中書監元弼
爲錄尚書事以尚書左僕射司馬子如爲尚書令以太原公高洋
爲左僕射夏五月甲午遣散騎常侍魏季景聘于梁丁酉太尉廣
陽王湛薨秋八月癸酉尚書令司馬子如坐事免九月甲申以開
府儀同三司濟陰王暉業爲太尉太師咸陽王坦坐事免以王還
第冬十月丁巳太保孫騰大司馬高隆之各爲括戶大使凡獲逃
戶六十餘萬十一月西河地陷有火出甲申以司徒高隆之爲尚

書令以前大司馬婁昭爲司徒庚子祀圓丘辛丑梁人來聘是歲吐谷渾地豆干室韋高麗蠕蠕勿吉等並遣使朝貢

三年春正月景申遣兼散騎常侍李獎聘于梁二月庚申吐谷渾國奉其從妹以備後庭納爲容華嬪夏五月甲辰大赦秋七月庚子梁人來聘冬十月遣中書舍人尉瑾聘于梁十二月以司空侯景爲司徒以中書令韓軌爲司空戊子以太保孫騰爲錄尚書事是歲高麗吐谷渾蠕蠕並遣使朝貢

四年夏五月壬寅梁人來聘六月庚子以司徒侯景爲河南大行臺應機討防秋七月壬寅遣兼散騎常侍元廓聘于梁八月移洛陽漢魏石經于鄴是歲室韋勿吉地豆干高麗蠕蠕並遣使朝貢

五年春正月己亥朔日有蝕之景午勃海王高歡薨辛亥司徒侯景降于西魏以求救西魏遣其將李弼王思政赴之思政等入據

潁川景乃出走豫州乙丑梁人來聘二月侯景復背西魏歸梁夏四月壬申大將軍高澄來朝甲午遣兼散騎常侍李緯聘於梁五月丁酉朔大赦戊戌以尚書右僕射襄城王旭爲太尉甲辰以太原公高洋爲尚書令領中書監以青州刺史尉景爲大司馬以開府儀同三司庾干爲太師以錄尚書事孫騰爲太傅以汾州刺史賀拔仁爲太保以司空韓軌爲司徒以領軍將軍可朱渾道元爲司空以司徒高隆之錄尚書事以徐州刺史慕容紹宗爲尚書左僕射高陽王斌爲右僕射戊午大司馬尉景薨六月乙酉帝爲勃海王舉哀於東堂服綢衰秋九月辛丑梁貞陽侯蕭明寇徐州堰泗水於寒山灌彭城以應侯景冬十一月乙酉以尚書左僕射慕容紹宗爲東南道行臺與大都督高岳潘相樂大破禽之及其二子瑀道十二月乙亥蕭明至帝御閭闔門讓而宥之岳等廻師

討侯景是歲高麗勿吉並遣使朝貢

六月春正月己亥大都督高岳等於渦陽大破侯景俘斬五萬餘人其餘溺死於渦水水爲不流景走淮南二月己卯梁遣使求和許之三月癸巳以太尉襄城王旭爲大司馬以開府儀同三司高岳爲太尉辛亥以冬春亢旱赦罪人各有差夏四月甲子吏部令史張永 and 青州人崔潤等僞假八官事覺糺檢首者六萬餘人甲戌太尉高岳司徒韓軌大都督劉豐等討王思政於潁川引洧水灌其城九月乙酉梁人來聘冬十月戊申侯景濟江推梁臨賀王正德爲主以攻建鄴是歲高麗室韋蠕蠕吐谷渾並遣使朝貢七年春正月戊辰梁北徐州刺史中山侯蕭正表以鎮內附封蘭陵郡公吳郡王三月丁卯侯景尅建業夏五月景辰侯景殺梁武帝戊寅勃海王高澄帥師赴潁川六月尅之獲西魏大將軍王

政等秋八月辛卯立皇子長仁爲太子盜殺勃海王高澄癸巳大赦內外百官並進二級甲午太原公高洋如晉陽冬十月癸未以開府儀同三司咸陽王坦爲太傅甲午以開府儀同三司潘相樂爲司空十二月甲辰吳郡王蕭正表薨己酉以并州刺史彭樂爲司徒是歲蠕蠕地豆干室韋高麗吐谷渾並遣使朝

八年春正月辛酉帝爲勃海王高澄表於東堂戊辰詔太原公高洋嗣事徙封齊郡王甲戌地豆干丹並遣使朝貢二月庚寅以尚書令高隆之爲太保三月庚申齊郡王高洋爵爲齊王夏四月乙巳蠕蠕遣使朝貢五月甲寅齊王爲相國總百揆備九錫之禮以齊國太妃爲王太后王妃王后景辰遜帝位於齊天保元年己未封帝爲中山王邑一萬戶上書不稱臣荅不稱詔載天子旌旗行魏正朔乘五時副車封王諸子爲縣公邑各一千

戶奉絹一萬疋錢一萬貫粟二萬石奴婢三百人水碾一具田百頃園一所於中山國立魏宗廟

二年十二月己酉中山王昺時年二十八

三年二月奉謚曰孝靜皇帝葬於鄴西漳北其後發之陵崩死者六十人帝好文美容儀力能挾石師子以踰墻射無不中嘉辰宴會多命羣臣賦詩從容沉雅有孝文風勃海王高澄嗣事甚忌焉以大將軍中兵參軍崔季舒爲中書黃門侍郎令監察動靜小大皆令季舒知澄與季舒書曰癡人復何似癡勢小差未帝嘗與獵於鄴東馳逐如飛監衛都督烏那羅受工伐從後呼帝曰天子莫走馬大將軍怒澄嘗侍帝飲大舉觴曰臣澄勸陛下帝不悅曰自古無不亡之國朕亦何用此活澄怒曰朕朕狗脚朕澄使季舒毆帝三拳奮衣而出明日澄使季舒勞帝帝亦謝焉賜絹季舒未敢

受以啓澄澄使東一段帝束百疋以與之曰亦一段爾帝不堪憂辱詠謝靈運詩曰韓亡子房奮秦帝魯連恥本自江海人志義動君子常侍侍講荀濟知帝意乃與華山王大器元瑾密謀於宮中僞爲山而作地道向北城至千秋門門者覺地下響動以告澄澄勒兵入宮曰陛下何意反耶臣父子功存社稷何負陛下耶及將殺諸妃嬪帝正色曰王自欲反何關於我我尚不惜身何況妃嬪澄下牀叩頭大啼謝罪於是酣飲夜久乃出居三日幽帝於舍章堂大器瑾等皆見烹於市及將禪位於文宣襄城王昺及司徒潘相樂侍中張亮黃門郎趙彥深等求入奏事帝在昭陽殿見之昺曰五行遍運有始有終齊王聖德欽明萬姓歸仰臣等昧死聞奏願陛下則堯禪舜帝便歛容答曰此事推挹已久謹當遜避又云若余須作詔書侍郎崔劼裴讓之奏云詔已作訖卽付楊愔進於

帝凡十條書訖曰將安朕何所復若爲而去楊愔對曰在北城別有舒宇還備法駕依常仗衛而去帝乃下御座步就東廊口詠范蔚宗後漢書贊云獻生不辰身播國屯終我四百永作虞賓所司奏請發帝曰古人念遺簪弊履欲與六官別可乎高隆之曰今天下猶陛下之天下况在後宮乃與夫人嬪以下訣莫不欷歔掩涕嬪趙國李氏誦陳思王詩云王其愛玉體俱享黃髮期皇后已下皆哭直長趙德以故犢車一乘候於東上閣帝上車德超上車特帝帝肘之曰朕畏天順人授位相國何物奴敢逼人趙德尚不下及出雲龍門王公百餘衣冠拜辭帝曰今日不減常道鄉公漢獻帝衆皆悲愴高隆之泣灑遂入北城下司馬子如南宅及文宣行幸常以帝自隨帝后封太原公主常爲帝嘗食以護視焉競遇醜而崩

論曰莊帝運接交喪招納勤王雖時事孔棘而卒有四海猾逆剪除權強擅命神慮獨斷芒刺未除而天未忘亂禍不旋踵自茲之後魏室土崩始則制屈強胡終乃權歸霸政主祭祀者不殊於寄坐遇黜辱者有甚於奕碁雖以節閔之明孝武之長祗以速是奔波文帝以剛強之質終以守雌自寶靜恭運終天祿高蹈唐虞各得其時也

北史卷五

魏本紀第五 終

魏本紀第五

北史卷六

齊本紀上第六

齊本紀上第六

齊高祖神武皇帝姓高氏諱歡字賀六渾勃海修人也六世祖隱
 晉玄菟太守隱生慶慶生泰泰生湖三世仕慕容氏及慕容寶敗
 國亂湖率眾歸魏為右將軍湖生四子第三子謚仕魏位至侍御
 史坐法徙居懷朔鎮謚生皇考樹生性通率不事家業任居白道
 南數有赤光紫氣之異隣人以為怪勸徙居以避之皇考曰安知
 非吉居之自若及神武生而皇妣韓氏殂養於同產姊壻鎮獄隊
 尉景家神武既累世北邊故習其俗遂同鮮卑長而深沈有大度
 輕財重士為豪俠所宗目有精光長頭高權齒白如玉少有人傑
 表家貧及婚武明皇后始有馬得給鎮為隊主鎮將遼西段長常
 奇神武貌謂曰君有康濟才終不徒然便以子孫為託及貴追贈

長司空擢其子寧而用之神武自隊主轉爲函使嘗乘驛過建興雲霽晝晦雷聲隨之半日乃絕若有神應者每行道路往來無風塵之色又嘗夢履衆星而行覺而內喜爲函使六年每至洛陽給令史麻祥使祥嘗以肉啗神武神武性不立食坐而進之祥以爲慢已咎神武四十及自洛陽還傾產以結客親故怪問之答曰吾至洛陽宿衛羽林相率焚領軍張彝宅朝廷懼其亂而不問爲政若此事可知也財物豈可常守邪自是乃有澄清天下之志與懷朔省事雲中司馬子如及秀容人劉貴中山人賈顯智爲奔走之友懷朔戶曹史孫騰外兵史侯景亦相友結劉貴常得一白鷹與神武及尉景蔡儁子如賈顯智等獵于沃野見一赤兔每搏輒逸遂至迴澤澤中有茅屋將奔入有狗自屋中出噬之鷹兔俱死神武怒以鳴鏑射之狗斃屋中乃有二人出持神武襟甚急其母兩

目盲曳杖呵其二子曰何故觸大家出甕中酒烹羊以待客因自言善暗相徧捫諸人言皆貴而指麾俱由神武又曰子如歷位顯智不善終飲竟出行數里還更訪之則本無人居乃向非人也由是諸人益加敬異孝昌元年柔玄鎮人杜洛周反於上谷神武乃與同志從之醜其行事私與尉景段榮蔡儁圖之不果而逃爲其騎所追文襄及魏永熙后皆幼武明后於牛上抱負之文襄屢落牛神武彎弓將射之以決去后呼榮求救賴榮透下取之以免遂奔葛榮又亡歸爾朱榮於秀容先是劉貴事榮盛言神武美至是始得見以憔悴故未之奇也貴乃爲神武更衣復求見焉因隨榮之廢廡有惡馬榮命剪之神武乃不加羈絆而剪竟不蹄齧已而起曰御惡人亦如此馬矣榮遂坐神武於牀下屏左右而訪時事神武曰聞公有馬十二谷色別爲羣將此竟何用也榮曰但言爾

意神武曰方今天子愚弱太后淫亂孽寵擅命朝政不行以明公
雄武乘時奮發討鄭儼徐紇而清帝側霸業可舉鞭而成此賀六
渾之意也榮大悅語自日中至夜半乃出自是每參軍謀後從榮
徙據并州抵揚州邑人龐蒼鷹止圍焦中每從外婦主人遙聞行
響動地蒼鷹毋數見圍焦上赤氣赫然屬天又蒼鷹嘗夜欲入有
青衣人拔刀叱曰何故觸王言訖不見始以爲異密覘之唯見赤
蛇蟠牀上乃益驚異因殺牛分肉厚以相奉蒼鷹毋求以神武爲
義子及得志以其宅爲第號爲南宅雖門巷開廣堂宇崇麗其本
所任圍焦以石堊塗之留而不毀至文宣時遂爲宮旣而榮以神
武爲親信都督于時魏明帝銜鄭儼徐紇逼靈太后未敢制私使
榮舉兵內向榮以神武爲前鋒至上黨明帝又私詔停之及帝暴
崩榮遂入洛因將篡位神武諫恐不聽請鑄像卜之鑄不成乃止

孝莊帝立以定策勲封銅鞮伯及爾朱榮擊葛榮令神武喻下賊
別稱王者七人後與行臺于暉破羊侃于太山尋與元天穆破邢
杲于濟南累遷第三鎮人酋長嘗在榮帳內榮嘗問左右曰一日
無我誰可主軍皆稱爾朱兆榮曰此正可統三千騎以還堪代我
主衆者唯賀六渾耳因誡兆曰爾非其足終當爲其子穿鼻乃以
神武爲晉州刺史於是大聚斂因劉貴貨榮下要人盡得其意時
州庫角無故自鳴神武異之無幾而孝莊誅榮及爾朱兆自晉陽
將舉兵赴洛召神武神武使長史孫騰辭以絳蜀汾胡欲反不可
委去兆恨焉騰復命神武曰兆舉兵犯上此大賊也吾不能久事
之自是始有圖兆計及兆入洛執莊帝以北神武聞之大驚又使
孫騰僞賀兆因密覘孝莊所在將劫以舉義不果乃以書喻之言
不宜執天子以受惡名於海內兆不納殺帝而與爾朱世隆等立

長廣王曄改元建明封神武爲平陽郡公及費也頭紇豆陵步藩
入秀容逼晉陽兆徵神武神武將往賀拔焉過兒請緩行以弊之
神武乃往逗留辭以河無橋不得渡步藩軍盛兆敗走初孝莊之
誅爾朱榮知其黨必有逆謀乃密敕步藩令襲其後步藩既敗兆
等以兵勢日盛兆又請救於神武神武內圖兆復慮步藩後之難
除乃與兆悉力破之藩死深德神武誓爲兄弟時世隆度律彥伯
共執朝政天光據關右兆據并州仲遠據東郡各擁兵爲暴天下
苦之葛榮衆流入并肆者二十餘萬爲契胡陵暴皆不聊生大小
二十六反誅夷者半猶草竊不止兆患之問計於神武神武曰六
鎮反殘不可盡殺宜選王素腹心者私就統焉若有犯者罪其帥
則所罪者寡兆曰善誰可行也賀拔允時在坐請神武神武拳毆
之折其一齒曰生平天柱時奴輩伏處分如鷹犬今日天下安置

在王而阿鞠泥敢誣下罔上請殺之兆以神武爲誠遂以委焉神
武以兆醉恐醒後或致疑貳遂出宣言受委統州鎮兵可集汾東
受令乃建牙陽曲川陳部分有款軍門者絳巾袍自稱梗楊驛子
願廁左右訪之則以力聞嘗於并州市搯殺人者乃署爲親信兵
士素惡兆而樂神武於是莫不皆至居無何又使劉貴請兆以并
肆頻歲霜早降戶掘黃鼠而食之皆面無穀色徒汚人國土請令
就食山東待溫飽而處分之兆從其議其長史慕容紹宗諫曰不
可今四方擾擾人懷異望況高公雄略又握大兵將不可爲兆曰
香火重誓何所慮邪紹宗曰親兄弟尚難信何論香火時兆左右
已受神武金因譖紹宗與神武舊隙兆乃禁紹宗而催神武發神
武乃自晉陽出滏口路逢爾朱榮妻鄉郡長公主自洛陽來馬三
百疋盡奪易之兆聞乃釋紹宗而問焉紹宗曰猶掌握中物也於

是自追神武至襄垣會漳水暴長橋壞神武隔水拜曰所以借公
主馬非有他故備山東盜耳王受公主言自來賜追今渡河而死
不辭此衆便叛兆自陳無此意因輕馬渡與神武坐幕下陳謝遂
授刀引頭使神武斫已神武大哭曰自天柱薨背賀六渾更何所
仰願大家千萬歲以申力用今旁人構間至此大家何忍復出此
言兆投刀於地遂刑白馬而盟誓爲兄弟留宿夜飲尉景伏壯士
欲執兆神武齧臂止之曰今殺之其黨必奔歸聚結兵饑馬瘦不
可相支若英雄屈起則爲害滋甚不如且置之兆雖勁捷而兇狡
無謀不足圖也旦日兆歸營又召神武神武將上馬詣之孫騰牽
衣乃止隔水肆罵馳還晉陽兆心腹念賢領降戶家累別爲營神
武僞與之善觀其佩刀因取之以殺其從者盡散於是士衆咸悅
倍願附從初魏真君中內學者奏言上黨有天子氣云在壺關大

王山武帝於是南巡以厭當之累石爲三封斬其北鳳皇山以毀
其形後上黨人居晉陽者號上黨坊神武寔居之及是行舍大王
山六旬而進將出滏口倍加約束纖毫之物不聽侵犯將過麥地
神武輒步牽馬遠近聞之皆稱高儀同將兵整肅益歸心焉遂前
行屯鄴北求糧於相州刺史劉誕誕不供有軍營租米神武自取
之魏普泰元年二月神武軍次信都高乾封隆之開門以待遂據
冀州是月爾朱度律廢元暉而立節閔帝欲羈縻神武三月乃白
節閔帝封神武爲勃海王徵使人覲神武辭四月癸巳又加授東
道大行臺第一鎮人酋長龐蒼鷹自太原來奔神武以爲行臺郎
尋以爲安州刺史神武自向山東養士繕甲禁兵侵掠百姓婦心
乃詐爲書言爾朱兆將以六鎮人配契胡爲部曲衆皆愁又爲并
州符徵兵討步落稽發萬人將遣之孫騰尉景僞請留五日如此

者再神武親送之郊雪涕執別人號慟哭聲動地神武乃喻之曰
與爾俱失鄉客義同一家不意在上乃爾徵召直向西已當死後
軍期又當死配國人又當死奈何衆曰唯有反耳神武曰反是急
計須推一人爲主衆願奉神武神武曰爾鄉里難制不見葛榮乎
雖百萬衆無刑法終自灰滅今以吾爲主當與前異不得欺漢兒
不得犯軍令生死任吾則可不爾不能爲取笑天下衆皆頓顙死
生唯命神武曰若不得已明日椎牛饗士喻以討爾朱兆之意封
隆之進曰千載一時普天幸甚神武曰討賊大順也拯時大業也
吾雖不武以死繼之何敢讓焉六月庚子建義於信都尚未顯背
爾朱氏及李元忠與高乾平殷州斬爾朱羽生首來謁神武撫膺
曰今日反決矣乃以元忠爲殷州刺史是歲兵威旣振乃抗表罪
狀爾朱氏世隆等祕表不通八月爾朱兆攻陷殷州李元忠來奔

孫騰以爲朝廷隔絕不權立天子則衆望無所係十月壬寅奉章
武王融子勃海太守朗爲皇帝年號中興是爲廢帝時度律仲遠
軍次晉陽爾朱兆會之神武用竇泰策縱反間度律仲遠不戰而
還神武乃敗兆於廣阿十一月攻鄴相州刺史劉誕嬰城固守神
武起土山爲地道徃建大柱一時焚之城陷入地麻祥時爲湯陰
令神武呼之曰麻都祥慚而逃

永熙元年正月十五拔鄴城據之廢帝進神武大丞相柱國大將
軍太師是時青州建義大都督崔靈珍大都督耿翔皆遣使歸附
行汾州事劉貴棄城來降閏三月尔朱天光自長安兆自并州度
律自洛陽仲遠自東郡同會鄴衆號二十萬挾洹水而軍節閔以
長孫承業爲大行臺總督焉神武令封隆之守鄴自出頓紫陌時
馬不滿二千步兵不至三萬衆寡不敵乃於韓陵爲圓陣連牛驢

以塞歸道於是將士皆爲死志四面赴擊之朱兆責神武以背已神武曰本勦力者共輔王室今帝何在兆曰永安枉害天柱我報讎耳神武曰我昔日親聞天柱計汝在戶前立豈得言不反耶且以君殺臣何報之有今日義絕矣乃合戰大敗之朱兆對慕容紹宗叩心曰不用公言以此將輕走紹宗反旗鳴角收聚散卒成軍容而西上高季式以七騎追奔度野馬岡與兆遇高昂望之不見哭曰喪吾弟矣夜久季式還血滿袖斛斯椿倍道先據河橋初普泰元年十月歲星熒惑鎮星太白聚於觜參色甚明太史占云當有王者興是時神武起於信都至是而破兆等四月斛斯椿執天光度律以送洛陽長孫承業遣都督賈顯智張歡入洛陽執世隆彥伯斬之兆奔并州仲遠奔梁州遂死焉時凶靈旣除朝廷慶悅初未戰之前月章武人張紹夜中忽被數騎將踰城至一大

將軍前敕紹爲軍導向鄴公佐受命者除殘賊紹回視之兵不測整疾無聲將至鄴乃放焉及戰之日朱氏軍人見陣外士馬四合蓋神助也旣而神武至洛陽廢節閔及中興王而立孝武孝武旣卽位授神武大丞相天柱大將軍太史世襲定州刺史增封并前十五萬戶神武辭天柱減戶五萬壬辰還鄴魏帝餞於乾脯山執手而別七月壬辰神武帥師北伐朱兆封隆之言侍中斛斯椿賀拔勝賈顯智等往事朱普皆反噬今在京師寵任必構禍隙神武深以爲然乃歸天光度律於京師斬之遂自滏口入爾朱兆大掠晉陽北保秀容并州平神武以晉陽四塞乃建大丞相府而定居焉朱兆旣至秀容分兵守險出入寇抄神武揚聲討之師出止者數四兆意怠神武揣其歲首賞宴會遣竇泰以精騎馳之一日一夜行三百里神武以大軍繼之

二年正月竇泰奄至尔朱兆庭軍人因宴休惰忽見泰軍驚走追破之於赤洪嶺兆自縊神武親臨厚葬之慕容紹宗以尔朱榮妻子及餘衆自保焉突城降神武以義故待之甚厚神武之入洛也尔朱仲遠部下都督橋寧張子期自滑臺歸命神武以其助亂且數反覆皆斬之斛斯椿由是内不自安乃與南陽王寶炬及武衛將軍元毗魏光祿王思政構神武於魏帝舍人元士弼又奏神武受敕大不敬故魏帝心貳於賀拔岳初孝明之時洛下以兩拔相擊謠言銅拔打鐵拔元家世將末好事者以二拔謂拓拔賀拔言俱將衰敗之兆時司空高乾密啟神武言魏帝之貳神武封呈魏帝殺之又遣東徐州刺史潘紹業密敕長樂太守龐蒼鷹令殺其弟昂昂先聞其兄死以稍刺柱伏壯士執紹業於路得敕書於袍領遂來奔神武抱其首哭曰天子枉害司空遠使以白武幡勞其

家屬時乾次弟慎在光州爲政嚴猛又縱部下取納魏帝使之之慎聞難將奔梁其屬曰公家勲重必不兄弟相及乃弊衣推鹿車歸勃海逢使者亦來奔於是魏帝與神武隙矣阿至羅虜正光以前嘗稱藩自魏朝多事皆叛神武遣使招納便附款先是詔以寇賊平罷行臺至是以殊俗歸降復授神武大行臺隨機處分神武賚其粟帛議者以爲徒費無益神武不從撫慰如初其首帥吐陳等感恩皆從指麾救曹泥取方侯受洛于大收其用河西費也頭虜紇豆陵伊利居苦池河恃險擁衆神武遣長史侯景屢招不從天平元年正月壬辰神武西伐費也頭虜紇豆陵伊利用於河西滅之遷其部落於河東二月永寧寺九層浮屠災旣而人有從東萊至云及海上人咸見之於海中俄而霧起乃滅說者以爲天意若曰永寧見災魏不寧矣飛入東海勃海應矣魏帝旣有異圖時侍

中封隆之與孫騰私言隆之喪妻魏帝欲妻以從妹騰亦未之信
心害隆之泄其言於斛斯椿椿以白魏帝又孫騰帶仗入省擅殺
御史並亡來奔稱魏帝搃舍人梁續於前光祿少卿元子幹攘臂
擊之謂騰曰語尔高王元家兒拳正如此領軍婁昭辭疾歸晉陽
魏帝於是以斛斯椿兼領軍分置督將及河南關西諸刺史華山
王鷲在徐州神武使邸珍奪其管籥建州刺史韓賢濟州刺史蔡
儁皆神武同義魏帝忌之故省建州以去賢使御史中尉綦儁察
儁罪以開府賈顯智爲濟州儁拒之魏帝逾怒五月下詔云將征
句吳發河南諸州兵增宿衛守河橋六月丁巳密詔神武曰宇文
黑獺自平破秦隴多求非分脫有變非常事資經略但表啟未全
背戾進討事涉怒怒遂召羣臣議其可否僉言假稱南伐內外戒
嚴一則防黑獺不虞二則可威吳楚時魏帝將伐神武神武部署

將帥慮疑故有此詔神武乃表曰荊州綰接蠻左密邇畿服關隴
恃遠將有逆圖臣今潛勒兵馬三萬擬從河東而度又遣恒州刺
史庫狄干瀛州刺史郭瓊汾州刺史斛律金前武衛大將軍彭樂
擬兵四萬從其來違津渡遣領軍將軍婁昭相州刺史竇泰前瀛
州刺史堯雄并州刺史高隆之擬兵五萬以討荊州遣冀州刺史
尉景前冀州刺史高敖曹濟州刺史蔡儁前侍中封隆之擬山東
兵七萬突騎五萬以征江左皆約勒所部伏聽處分魏帝知覺其
變乃出神武表命羣官議之欲止神武諸軍神武入集在并僚佐
令其博議還以表聞仍以信誓自明忠欵曰臣爲嬖佞所間陛下
一旦賜疑令猖狂之罪余朱時計臣若不盡誠竭節敢負陛下則
使身受天殃子孫殄絕陛下若垂信赤心使干戈不動佞臣一二
人願斟量廢出辛未帝復錄在京文武議意以答神武使舍人溫

子昇草敕子昇逡巡未敢作帝據胡牀拔劍作色子昇乃爲敕曰
前持心血遠以示王深冀彼此共相體悉而不良之徒坐生閒貳
近孫騰倉卒向彼致使聞者疑有異謀故遣御史中尉蔡雋具申
朕懷今得王啟言誓懇惻反覆思之猶所未解以朕眇身遇王武
略不勞尺刃坐爲天子所謂生我者父母貴我者高王今若無事
背王規相攻討則使身及子孫還如王誓皇天后土實聞此言近
慮宇文爲亂賀拔勝應之故纂嚴欲與王俱爲聲援宇文今日使
者相望觀其所爲更無異迹賀拔在南開拓邊境爲國立功念無
可責君若欲分討何以爲辭東南不賓爲日已久先朝以來置之
度外今天下戶口減半未宜窮兵極武朕旣闇昧不知佞人是誰
可列其姓名令朕知也如聞庫狄干語王云本欲取懦弱者爲主
無事立此長君使其不可駕御今但作十五日行自可廢之更立

餘者如此議論自是王問勳人豈出佞臣之口去歲封隆之背叛
今年孫騰逃走不罪不送誰不怪王騰旣爲禍始曾無愧懼王若
事君盡誠何不斬送二首王雖啟圖西去而四道俱進或欲南度
洛陽或欲東臨江左言之者猶應自怪聞之者寧能不疑王若守
誠不貳晏然居北在此雖有百萬之衆終無圖彼之心王脫信邪
棄義舉旗南指縱無四馬隻輪猶欲奮空拳而爭死朕本寡德王
已立之百姓無知或謂實可若爲化所圖則彰朕之惡假令還爲
王殺幽辱壅粉了無遺恨何者王旣以德見推以義見舉一朝背
德舍義便是過有所歸本望君臣一體若合符契不圖今日分疎
到此古語云越人射我笑而道之吾兄射我泣而道之朕旣親王
情如兄弟所以投筆拊膺不覺歔歔初神武自京師將北以爲洛
陽久經喪亂王氣衰盡雖有山河之固土地褊狹不如鄴請遷都

魏帝曰高祖定鼎河洛爲永永之基經營制度至世宗乃畢王旣
功在社稷宜遵太和舊事神武奉詔至是復謀焉遣兵千騎鎮建
興益河東及濟州兵於白溝虜船不聽向洛諸州和糴粟運入鄴
城魏帝又敕神武曰王若厭伏人情杜絕物議唯有歸河東之兵
罷建興之戎送相州之粟追濟州之軍令蔡儁受代使邸珍出徐
止戈散馬各事家業脫須糧廩別遣轉輸則讒人結舌疑悔不生
王高枕太原朕垂拱京洛終不舉足渡河以干戈相指王若馬首
南向問鼎輕重朕雖無武欲止不能必爲社稷宗廟出萬死之策
決在於王非朕能定爲山止簣相爲惜之魏帝時以任祥爲兼尚
書左僕射加開府祥棄官走至河北據郡待神武魏帝乃敕文武
官北來者任去留下詔罪狀神武爲北伐經營神武亦勒馬宣告
曰孤遇尔朱擅權舉大義於四海奉戴主上義貫幽明橫爲斛斯

椿讒構以誠節爲逆首昔趙鞅與晉陽之甲誅君側惡人今者南
邁誅椿而已以高昂爲前鋒曰若用司空言豈有今日之舉司馬
子如答神武曰本欲立小者正爲此耳魏帝徵兵關右召賀拔勝
赴行在所遣大行臺長孫承業大都督潁川王斌之斛斯椿共鎮
武牢汝陽王暹鎮石濟行臺長孫子彥帥前恒農太守元洪略鎮
陝賈顯智率豫州刺史斛斯元壽伐蔡儁神武使竇泰與左箱大
都督莫多婁貸文逆顯智韓賢逆暹乙素單降泰貸文與顯智遇
於長壽津顯智陰約降引軍退軍司元玄覺之馳還請益師魏帝
遣大都督侯幾紹赴之戰於滑臺東顯智以軍降紹死之七月魏
帝躬率大衆屯河橋神武至河北十餘里再遣口申誠款魏帝不
報神武乃引軍度河魏帝問計於羣臣或云南依賀拔勝或云西
就關中或云守洛口死戰未決而元斌之與斛斯椿爭權不睦斌

之棄椿經還給帝云神武兵至卽日魏帝遜於長安巴西神武入洛停於永寧寺八月甲寅召集百官謂曰爲臣奉主匡救危亂若處不諫爭出不陪隨緩則耽寵爭榮急便竄失臣節安在遂收開府儀同三司叱列延慶兼尚書左僕射辛雄兼吏部尚書崔孝芬都官尚書劉厥兼度支尚書楊機散騎常侍元士弼竝殺之誅其貳也士弼籍沒家口神武以萬機不可曠廢乃與百僚議以清河王亶爲大司馬居尚書下舍而承制決事焉王稱警蹕神武醜之禮降神武退舍河東命行臺尚書長史薛瑜守潼關大都督庫狄溫守封陵於蒲津西岸築城守華州以薛紹宗爲刺史高昂行豫州事神武自發晉陽至此凡四十啟魏帝皆不答九月庚寅神武還至洛陽乃遣僧道榮奉表關中又不答乃集百寮沙門耆老議

所推立以爲自孝昌衰亂國統中絕神主靡依昭穆失序永安以孝文爲伯考永熙遷孝明於夾室業喪祚短職此之由遂議立清河王世子善見議定白清河王王曰天子無父苟使兒立不惜餘生乃立之是爲孝靜帝魏於是始分爲二神武以孝武旣西恐逼嶺陝洛陽復在河外接近梁境如向晉陽形勢不能相接依議遷鄴護軍祖瑩贊焉詔下三日車駕便發戶四十萬狼狽就道神武留洛陽部分事畢還晉陽自是軍國政務皆歸相府先是童謠曰可憐青雀子飛來鄴城裏羽翮垂欲成化作鸚鵡子好事者竊言雀字謂魏帝清河王鸚鵡謂神武也初孝昌中山胡劉蠡升自稱天子年號神嘉居雲陽谷西土歲被其寇謂之胡荒二年正月西魏渭州刺史可朱渾道元擁衆內屬神武迎納之壬戌神武襲擊劉蠡升大破之己巳魏帝褒詔以神武爲相國假黃

越劔履上殿入朝不趨神武固辭三月神武欲以女妻蠡升太子候其不設備辛酉潛師襲之其北部王斬蠡升首以送其衆復立其子南海王神武進擊之又獲南海王及其弟西海王北海王皇后公卿已下四百餘人胡魏五萬戶壬申神武朝于鄴四月神武請給遷人廩各有差九月甲寅神武以州郡縣官多非法請出使問人疾苦

三年正月甲子神武帥庫狄干等萬騎襲西魏夏州身不火食四日而坐縛稍爲梯夜入其城禽其刺史費也頭斛拔俄彌突因而用之留都督張瓊以鎮守遷其部落五千戶以歸西魏靈州刺史曹泥與其婿涼州刺史劉豐遣使請內屬周文圍泥水灌其城不沒者四尺神武命阿至羅發騎三萬徑度靈州繞出西軍後獲馬五十匹西師乃退神武率騎迎泥豐生拔其遺戶五千以歸復泥

官爵魏帝詔加神武九錫固讓乃止二月神武令阿至羅逼西魏秦州刺史建忠王万俟普撥神武以衆應之六月甲午普撥與其子太宰受洛于幽州刺史叱于寶樂右衛將軍破六韓常及督將三百餘人擁部來降八月丁亥神武請均斗尺班於天下九月辛亥汾州胡王迺觸曹貳龍聚衆反署立百官年號平都神武討平之十二月丁丑神武自晉陽西討遣兼僕射行臺汝陽王暹司徒高昂等趣上洛大都督竇泰入自潼關

四年正月癸丑竇泰軍敗自殺神武軍次蒲津以冰薄不得赴救乃班師高昂攻尅上洛二月乙酉神武以并肆汾建晉東雍南汾秦陝九州霜旱人饑流散請所在開倉振給六月壬申神武如天池獲瑞石隱起成文曰六王三川十一月壬辰神武西討自蒲津濟衆二十萬周文軍於沙苑神武以地阨少却西人鼓噪而進軍

大亂棄器甲十有八萬神武跨橐駝候船以歸

元象元年三月辛酉神武固請解丞相魏帝許之四月庚寅神武朝于鄴壬辰還晉陽請開酒禁并振恤宿衛武官七月壬午行臺侯景司徒高昂圍西魏將獨孤信於金墉西魏帝及周文竝來赴救大都督庫狄干帥諸將前驅神武總衆繼進八月辛卯戰於河陰大破西魏軍俘獲數萬司徒高昂大都督李猛宗顯死之西師之敗獨孤信先入關周文留其都督長孫子彥守金墉遂燒營以遁神武遣兵追奔至峭不及而還初神武知西師來侵自晉陽率衆馳赴至孟津未濟而軍有勝負旣而神武渡河子彥亦棄城走神武遂毀金墉而還十一月庚午神武朝於京師十二月壬辰還晉陽

興和元年七月丁丑魏帝進神武爲相國錄尚書事固讓乃止十

一月乙丑神武以新宮成朝於鄴魏帝與神武讌射神武降階下稱賀又辭勃海王及都督中外諸軍事詔不許十二月戊戌神武還晉陽

二年十二月阿至羅別部遣使請降神武率衆迎之出武州塞不見大獵而還

三年五月神武巡北境使使與蠕蠕通和

四年五月辛巳神武朝於鄴請令百官每月面敷政事明揚仄陋納諫屏邪親理獄訟褒黜勤怠牧守有德節級相坐椒掖之內進御以序後園鷹犬悉皆棄之六月甲辰神武還晉陽九月神武西征十月巳亥圍西魏儀同三司王思政於玉壁城欲以致敵西師不敢出十一月癸未神武以大雪士卒多死乃班師

武定元年二月壬申北豫州刺史高慎據武牢西叛三月壬申周

文率衆援高慎圍河橋南城戊申神武大敗之於芒山禽西魏督將以下四百餘人俘斬六萬計是時軍士有盜殺驢者軍令應死神武弗殺將至并州決之明日復戰奔西軍告神武所在西師盡銳來攻衆潰神武失馬赫連陽順下馬以授神武與蒼頭馮文洛扶上俱走從者步騎六七人追騎至親信都督尉興慶曰王去矣興慶腰邊百箭足殺百人神武勉之曰事濟以爾爲懷州若死則用爾子興慶曰兒小願用兄許之興慶鬪矢盡而死西魏太師賀拔勝以十三騎逐神武河州刺史劉洪徽射中其二勝稍將中神武以孝先橫射勝馬墮遂免豫洛二州平神武使劉豐追奔狗地但七月神武貽周文書責以殺孝武之罪八月辛未魏帝詔神武爲相國錄尚書事大行臺餘如故固辭乃止是月神武命於四州北山築城西自馬陵戍東至土陞四十日罷十二月已

卯神武朝于京師庚辰還晉陽

二年三月癸巳神武巡行冀定二州因朝京師以冬春亢旱請蠲縣責振窮乏宥死罪以下又請授老人板職各有老四月丙辰神武還晉陽十一月神武討山胡破平之俘獲一萬餘口分配諸州

三年正月甲午開府儀同三司尔朱文暢開府司馬任胄都督鄭仲禮中府主簿李世林前開府參軍房子遠等謀賊神武因十五日夜打蒺懷刃而入其黨薛季孝以告竝伏誅丁未神武請於并州置晉陽宮以處配口三月乙未神武朝鄴景午還晉陽十月丁卯神武上言幽安定三州北接奚蠕蠕請於險要修立城戍以防之躬自臨履莫不嚴固乙未神武請釋芒山俘桎梏配以人間寡婦

四年八月癸巳神武將西伐自鄴會兵於晉陽殿中將軍曹魏祖

曰不可今八月西方王以死氣逆生氣爲客不利主人則可兵果行傷大將神武不從自東西魏構兵鄴下每先有黃黑螳陣鬪占者以爲黃者東魏戎衣色黑者西魏戎衣色人閒以此候勝負是時黃螳盡死九月神武圍玉壁以挑西師不敢應西魏晉州刺史韋孝寬守玉壁城中出鐵面神武使元盜射之每中其目用李業興孤虛術萃其北北天險也乃起土山鑿十道又於東面鑿二十一道以攻之城無水汲於汾神武使移汾一夜而畢孝寬奪據土山頓軍五旬城不拔死者七萬人聚爲一冢有星墜于神武營衆驢並鳴士皆警懼神武有疾十一月庚子輿疾班師庚戌遣太原公洋鎮鄴辛亥徵世子澄至晉陽有惡鳥集於亭樹世子使斛律光射殺之己卯神武以無功表解都督中外諸軍事魏帝優詔許焉是時西魏言神武中弩神武聞之乃免坐見諸貴使斛律金

敕勒歌神武自和之哀感流涕侯景素輕世子嘗謂司馬子如曰王在吾不敢有異王無吾不能與鮮卑小兒共事子如掩其口至是世子爲神武書召景景先與神武約得書書皆微點乃來書至無點景不至又聞神武疾遂擁兵自固神武謂世子曰我雖疾介面更有餘憂色何也世子未對又問曰豈非憂侯景叛邪曰然神武曰景專制河南十四年矣常有飛揚跋扈志願我能養豈爲汝駕御也今四方未定勿遽發哀庫狄干鮮卑老公斛律金敕勒老公並性道直終不負汝可朱渾道元劉豐生遠來投我必無異心賀拔焉過兒樸實無罪過潘相樂今本作道人心和厚汝兄弟當得其力韓軌少戇宜寬借之彭相樂心腹難得宜防護之少堪敵侯景者唯有慕容紹宗我故不貴之留以與汝宜深加殊禮委以

經略

五年正月朔日蝕神武曰日蝕其爲我邪死亦何恨景午陳啟於魏帝是日崩於晉陽時年五十二祕不發喪六月壬午魏帝於東堂舉哀三日制總哀詔凶禮依漢大將軍霍光東平王蒼故事贈假黃鉞使持節相國都督中外諸軍事齊王璽紱輜輶車黃屋左纛前後羽葆鼓吹輕車介士兼備九錫殊禮謚獻武王八月甲申葬於鄴西北漳水之西魏帝臨送於紫陌天保初追崇爲獻武帝廟號太祖陵曰義平天統元年改謚神武皇帝廟號高祖神武性深密高岸終日儼然人不能測機權之際變化若神至於軍國大略獨運懷抱文武將吏罕有預之經馭軍眾法令嚴肅臨敵制勝策出無方聽斷昭察不可欺犯知人好士全護勲舊性周給每有文教常殷勤款悉指事論心不尚綺靡擢人授任在於得才苟其所堪乃至拔於厮養有虛聲無實者稀見任用諸將出討奉行方

略罔不克捷違失指畫多致奔亡雅尚儉素刀劍鞍勒無金玉之飾少能劇飲自當大任不過三爵居家如官仁恕愛士始范陽盧景裕以明經稱魯郡韓毅以工書顯咸以謀逆見禽竝蒙恩置之第館教授諸子其文武之士盡節所事見執獲而不罪者甚多故遐邇歸心皆思効力至南和梁國北懷蠕蠕吐谷渾阿至羅威所招納獲其力用規略遠矣

世宗文襄皇帝諱澄字子惠神武長子也母曰婁太后生而岐嶷神武異之魏中興元年立爲勃海王世子就杜詢講學敏悟過人詢甚歎服二年加侍中開府儀同三司尚孝靜帝妹馮翊長公主時年十二神情雋爽便若成人神武試問以時事得失辨析無不中理自是軍國籌策皆預之天平元年加使持節尚書令大行臺并州刺史三年入輔朝政加領軍左右京畿大都督時人雖聞器

識猶以少年期之而機略嚴明事無疑滯於是朝野振肅元象元年攝吏部尚書魏自崔亮以後選人常以年勞爲制文襄乃釐改前式銓擢唯在得人又沙汰尚書郎妙選人地以充之至于才名之士咸被薦擢假有未居顯位者皆致之門下以爲賓客每山園游宴必見招攜執射賦詩各盡其所長以爲娛適興和二年加大將軍領中書監仍攝吏部尚書自正光已後天下多事在任羣官廉潔者寡文襄乃奏吏部郎崔暹爲御史中尉糾劾權豪無所縱捨於是風俗更始私枉路絕乃榜於街衢具論經國政術仍開直言之路有論事上書苦言切至者皆優容之武定四年十一月神武西討不豫班師文襄馳赴軍所侍衛還晉陽五年正月景午神武崩祕不發喪辛亥司徒侯景據河南反潁州刺史司馬世雲以城應之景誘執潁州刺史高元成襄州刺史李密廣州刺史暴顯

等遣司空韓軌率衆討之四月壬申文襄朝于鄴六月己巳韓軌等自潁川班師丁丑文襄還晉陽乃發喪告喻文武陳神武遺志七月戊戌魏帝詔以文襄爲使持節大丞相都督中外諸軍錄尚書事大行臺勃海王文襄啟辭位願停王爵壬寅魏帝詔太原公洋攝理軍國遣中使敦喻八月戊辰文襄啟申神武遺令請減國邑分封將督各有差辛未朝于鄴固辭丞相魏帝詔曰旣朝野攸馮安危所繫不得令遂本懷須有權奪可復前大將軍餘如故壬辰尚書祠部郎中元瑾梁降人苟濟長秋卿劉思逸及淮南王宣洪華山王大器濟北王徽等謀害文襄事發伏誅九月己亥文襄請舊勳灼然未蒙齒錄者悉求旌賞朝士名行有聞或以年耆疾滿告謝者准其本秩授以州郡不得莅事聽陰子孫自天平元年以来遇事亡官者聽復本資豪貴之家不得占護山澤其第宇車

服婚姻送葬奢僭無限者並令禁斷從太昌元年以來將帥有殊功異效者其子弟年十歲以上請聽依第出身其兵士從征身殞陣塲者蠲其家租課若有藏器避世者以禮招致隨才擢叙罷營構之官在朝百司怠惰不勤有所曠廢者免所居官若清幹克濟皎然可知者卽宜超叙不拘常式辛丑文襄還晉陽武定六年正月己未文襄朝於鄴二月己卯梁遣使慰文襄并請通和文襄許其和而不答書侯景之叛也南兗州刺史石長宣頗相影響諸州刺史守令佐史多被誑誤景破後悉被禽獲尚書咸處極刑文襄竝請減降於是斬長宣其餘竝從寬宥三月戊申文襄請朝臣及牧守令長各舉賢良及驍武膽略堪守邊城者務在得才不拘職素其稱事六品散官五品以上朝廷所悉不在舉限其稱事七品散官六品以下并及州郡縣雜白身不限在官解職竝任舉之隨

才進擢辛亥文襄南臨黎陽濟於武牢自洛陽從太行而反晉陽於路遺書朝士以相戒厲於是朝野承風莫不震肅六月文襄巡北邊城戍振賜各有差七月乙卯文襄朝于鄴八月庚寅還晉陽使大行臺慕容紹宗與太尉高岳大都督劉豐討王思政于潁川先是文襄遣行臺尚書辛術率諸將略江淮之北至是凡所獲二十三州七年四月甲辰魏帝進文襄位相國封齊王綠綬綬贊拜不名入朝不趨劔履上殿食冀州之勃海長樂安德武邑瀛州之河間五郡邑十五萬戶使持節都督中外諸軍事錄尚書大行臺竝如故丁未文襄入朝固讓魏帝不許五月戊寅文襄帥師自鄴赴潁川六月景申克潁川禽西魏大將軍王思政以忠於所事釋而待之七月文襄朝于鄴請魏帝立皇太子復辭爵位殊禮未報八月辛卯遇盜而崩初梁將蘭欽子京見虜文襄以配厨欽求贖

之不許京再訴文襄使監厨蒼頭薛豐洛杖之曰更訴當殺汝京
與其黨六人謀作亂時文襄將授魏禪與陳元康崔季舒屏左右
謀於北城東栢堂太史啟言宰輔星甚微變不一月時京將進食
文襄却之謂人曰昨夜夢此奴斫我又曰急殺却京聞之寘刀於
盤下冒言進食文襄見之怒曰我未索食何遽來京揮刀曰將殺
汝文襄自投傷足入牀下賊黨至去牀因見弑時年二十九祕不
發喪明年正月辛酉魏帝舉哀於太極東堂詔贈物八萬段凶事
依漢大將軍霍光東平王蒼故事贈假黃鉞使持節相國都督中
外諸軍事齊王璽紘輜輶車黃屋左纛後部羽葆鼓吹輕車介士
備九錫禮謚曰文襄王二月甲申葬於義平陵之北天保初追尊
曰文襄皇帝廟號世宗陵曰峻成文襄美姿容善言笑談諢之際
從容弘雅性聰警多籌策當朝作相聽斷如流愛士好賢待之以禮

有神武之風焉然少壯氣猛嚴峻刑法高慎西叛侯景南翻非直
本懷狼戾兼亦有懼威略情欲奢淫動乖制度嘗於宮西造宅牆
院高麗聽事宏壯亞太極殿神武入朝責之乃止

論曰昔魏氏失馭中原蕩析齊神武爰從晉部大號與方屢戰而
翦凶徒一麾以清京洛尊王匡國功濟天下既而魏武帝規避權
逼歷數既盡適所以速關河之分焉文襄嗣膺霸道威略昭著內
除姦逆外拓淮夷擯斥貪殘存情人物而志在峻法急於御下於
前王之德所未同蓋夫意人心好生惡殺雖吉凶報應未皆影
響總而論之積善多慶然文襄之禍生所忽蓋有由焉

北史卷六 齊本紀上第六終

齊本紀上第六終

北史卷七

齊本紀中第七

齊本紀中第七

顯祖文宣皇帝諱洋字子進神武第二子文襄之母弟也武明太后初孕帝每夜有赤光照室太后私怪之及產命之曰侯尼于鮮卑言有相子也以生子晉陽一名晉陽樂時神武家徒壁立后與親姻相對共憂寒餒帝生始數月尚未能言欬然曰得活太后及左右大驚不敢言及長黑色大頰兌下鱗身重蹠瞻視審定不好戲弄深沈有大度晉陽有沙門乍愚乍智時人不測呼為阿禿師太后見諸子焉歷問祿位至帝再三舉手指天而已口無所言見者異之神武嘗從諸子過鳳陽門有龍在上唯神武與帝見之內雖明敏貌若不足文襄每嗤之曰此人亦得富貴相法亦何由可解神武以帝貌陋神彩不甚發揚曾問以時事帝略有所辨儻語

一事必得事衷又嘗令諸子各使理亂綵帝獨抽刀斬之曰亂者
須斬神武以爲然又各配兵四出而使彭樂率甲騎僞攻之文襄
等怖撓帝勒衆與彭樂相格樂免胄言情猶禽之以獻由是神武
稱異之謂長史薛琬曰此兒意識過吾琬亦私怪之幼時師事范
陽盧景裕默識過人未嘗有所自明景裕不能測也天平二年封
太原郡公累遷尚書左僕射後從文襄行過遼陽山獨見天門開
餘無人見者武定五年神武崩猶祕凶事衆情疑駭帝雖內嬰巨
痛外若平常人情頗安魏帝授帝尚書令中書監京畿大都督七
年八月文襄遇賊帝在城東雙堂事出倉卒內外震駭帝神色不
變指麾部分自嚮斬羣賊而漆其首祕不發喪徐言奴反大將軍
被傷無大苦也當時內外莫不驚異乃諷魏朝立皇太子因以六
赦乃赴晉陽總庶政帝內雖明察外若不了老臣宿將皆輕帝於

是帝推誠接下務從寬厚事有不便者咸蠲省焉羣情始服八年
正月辛酉魏帝爲文襄舉哀於東堂戊辰詔進帝位使持節丞相
都督中外諸軍錄尚書事大行臺齊郡王食邑一萬戶三月庚申
又進封齊王食冀州之勃海長樂安德武邑瀛州之河間五郡邑
十萬戶帝自居晉陽寢室每夜有光如晝旣爲王夢人以筆點已
額旦日以語館客王曇首曰吾其退乎曇首拜賀曰王上加點爲
王當進也五月辛亥帝如鄴光州獲九尾狐以獻甲寅魏帝遣兼
太尉彭城王韶司空潘相樂奉冊進帝位相國總百揆以冀州之
勃海長樂安德武邑瀛州之河間高陽章武定州之中山常山博
陵十郡邑二十萬戶加九錫殊禮齊王如故景辰魏帝遜位別宮
又使兼太尉彭城王韶兼司空敬顯雋奉冊禪位致璽書於帝并
奉皇帝璽綬禪代之禮一依唐虞漢魏故事帝累表固辭詔不許

於是尚書令高隆之率百寮勸進天保元年夏五月戊午皇帝卽位於南郊升壇柴燎告天是日鄴下獲赤雀獻于郊所事畢還宮御太極前殿大赦改元百官進兩大階六州緣邊職人三大階自魏孝莊已後百官絕祿至是復給焉已未詔封魏帝爲中山王追尊皇祖文穆王爲文穆皇帝皇祖妣爲文穆皇后皇考獻武王爲獻武皇帝皇兄文襄王爲文襄皇帝命有司議祖宗以聞辛酉尊王太后爲皇太后乙酉降魏朝封爵各有差其信都從義及宣力霸朝者又西來人并武定六年以來南來投化者不在降限辛未遣大使於四方觀察風俗問人疾苦甲戌遷神主於太廟六月辛巳詔改封崇聖侯孔長爲恭聖侯邑一百戶以奉孔子祀并下魯郡以時修葺廟宇又詔吉凶車服制度各爲等差具立條式使儉而獲中分遣使人致祭於五岳四瀆其堯祠舜廟下及孔父老君

等載於祀典者咸秩罔遺又詔冀州之勃海長樂二郡先帝始封之國義旗初起之地并州之太原青州之齊郡霸朝所在王命是基君子有作貴不忘本齊郡勃海可竝復一年長樂復二年太原復三年壬午詔故太傅孫騰故太保尉景故大司馬婁昭故司徒高敖曹故尚書左僕射慕容紹宗故領軍万俟干故定州刺史段榮故御史中尉劉貴故御史中尉竇泰故殷州刺史劉豐故濟州刺史蔡儁等竝左右先帝經贊皇基或不幸早歿或殞身王事可遣使者就墓致祭并撫問妻子又詔封宗室太尉高岳爲清河王太保高隆之爲平原王開府儀同三司高暉彥爲平秦王徐州刺史高思宗爲上洛王營州刺史高長弼爲廣武王兼武衛將軍高普爲武興王兼武衛將軍高子瑗爲平昌王兼北中郎將高顯國爲襄樂王前太子庶子高獻爲趙郡王揚州縣開國公高孝緒爲

修城王又詔封功臣太師庫狄干爲章武王大司馬斛律金爲咸陽王并州刺史賀拔仁爲安定王殷州刺史韓軌爲安德王瀛州刺史可朱渾道元爲扶風王司徒公彭樂爲陳留王司空公潘相樂爲河東王癸未詔封諸弟青州刺史浚爲永安王尚書左僕射淹爲平陽王定州刺史洸爲彭城王儀同三司演爲常山王冀州刺史渙爲上黨王儀同三司洸爲襄城王儀同三司湛爲長廣王潛爲任城王湜爲高陽王濟爲博陵王疑爲新平王潤爲馮翊王洽爲漢陽王丁亥詔立王子殷爲皇太子王后李氏爲皇后庚寅詔以太師庫狄干爲太宰司徒彭樂爲太尉司空潘相樂爲司徒開府儀同三司司馬子如爲司空己亥以皇太子初入東宮赦畿內及并州死罪已下降餘州死罪已下囚秋七月辛亥尊文襄妃元氏爲文襄皇后宮曰靜德又封文襄子孝琬爲河間王孝瑜爲

河南王乙卯以尚書令平原王封隆之爲錄尚書事尚書左僕射平陽王淹爲尚書令改御史中尉還爲中丞詔魏御府所有珍奇雜綵常所不給人者悉送內後園以供七日宴賜八月詔郡國修立黷序廣延髦俊敦述儒風其國子學生亦依舊銓補往者文襄皇帝所運蔡邕石經五十二枚移置學館依次修立又詔求直言正諫之士待以不次命牧人之官廣勸農桑庚寅詔曰朕以虛薄嗣弘王業思所以贊揚盛績播之萬古雖史官執筆有聞無墜猶恐緒言遺美時或未書在位王公文武大小降及庶人爰至僧徒或親奉音旨或承傳旁說凡可載之文籍悉條封上甲午詔曰魏世議定麟趾格遂爲通制官司施用猶未盡善羣官可更論討新令未成之間仍以舊格從事九月癸丑以領東夷校尉遼東郡開國公高麗王成爲使持節侍中驃騎大將軍領護東夷校尉王公

如故丁卯詔以梁侍中使持節假黃鉞都督中外諸軍事大將軍承制邵陵王蕭綸爲梁王庚午幸晉陽是日皇太子入居涼風堂監國冬十月己卯法駕御金輅入晉陽宮朝皇太后於內殿辛巳曲赦并州太原郡晉陽縣及相國府四獄囚乙酉以持進元紹爲尚書左僕射并州刺史段韶爲右僕射壬辰罷相國府留騎兵外兵曹各立一省別掌機密十一月周文帝帥師至陝城分騎北度至建州甲寅梁湘東王蕭繹遣使朝貢景寅帝親戎出次城東周文帝見軍容嚴盛歎曰高歡不死矣遂班師十二月辛丑車駕至自晉陽是歲高麗蠕蠕吐谷渾庫莫奚竝遣使朝貢

二年春正月丁未梁湘東王蕭繹遣使朝貢辛亥祀圓丘以神武皇帝配癸亥親耕籍田乙丑享太廟二月壬辰太尉彭樂謀反伏誅三月景午襄城王淸薨己未詔梁承制湘東王繹爲梁使持節假黃鉞相國建梁臺總百揆承制梁王庚申司空馬子如坐事免是月梁交梁義新四州刺史各以地內附西魏文帝崩夏四月壬辰梁王蕭繹遣使朝貢六月庚午以前司空馬子如爲太尉秋七月己卯改顯陽殿還爲昭陽殿辛卯改殷州爲趙州以避太子之諱是月侯景廢梁簡文帝立蕭棟爲主九月壬申免諸伎作屯牧雜色役隸之徒爲白戶發已行幸趙定二州因至晉陽冬十月戊申起宣光建始嘉福仁壽諸殿庚申蕭繹遣使朝貢丁卯文襄皇帝神主入于廟十一月侯景廢梁主棟僭卽僞位於建鄴自稱曰漢十二月中山王殂是歲蠕蠕室韋高麗並遣使朝貢三年春正月景申帝親討庫莫奚於代郡大破之以其口配山東爲百姓二月蠕蠕主阿那瓌爲突厥所破瓌自殺其太子菴羅辰及瓌從弟登注俟刑登注子庫提並擁衆來奔蠕蠕餘衆立注次

子鐵伐爲主辛丑契丹遣使朝貢三月戊子詔清河王岳司徒潘相樂行臺辛術帥師南伐癸巳詔進梁王蕭繹爲梁主夏四月壬申東南道行臺辛術於廣陵送傳國八璽甲申以吏部尚書楊愔爲尚書右僕射六月巳亥清河王岳等班師乙卯車駕幸晉陽冬十月乙未次黃櫨嶺仍起長城北至社于戌四百餘里立三十六戌十一月辛巳梁王蕭繹卽位于江陵是爲元帝遣使來聘十二月壬子車駕還宮戊午幸晉陽是歲西魏廢帝元年

四年春正月景子山胡圍離石成帝親討之未至而逃因巡三堆戌大狩而旋戌寅庫莫奚遣使朝貢自魏末用永安錢又有數品皆輕濫巳丑鑄新錢文曰常平五銖二月送蠕蠕鐵伐父登注及子庫提還北鐵伐尋爲契丹所殺國人復立登注爲主仍爲其大人阿富提等所殺國人復立庫提爲主夏四月車駕還宮戊午西

南有大聲如雷五月庚午校獵於林慮山戊子還宮六月甲辰章武王庫狄干薨秋北巡冀定幽安仍北討契丹冬十月丁酉車駕至平州遂西道趣長壑甲辰帝步踰山嶺爲士卒先指麾奮擊大破契丹是行也帝露頭袒身晝夜不息行千餘里唯食肉飲水氣色彌厲丁巳登竭石山臨滄海十一月巳未帝自平州還遂如晉陽閏月壬寅梁人來聘十二月巳未突厥復攻蠕蠕蠕舉國來奔癸亥帝北討突厥迎納蠕蠕乃廢其主庫提立阿那瓌子菴羅辰爲主置之馬邑川追突厥於朔方突厥請降許之而還自是貢獻相繼

五年春正月巳丑帝討山胡大破之男子十二巳上皆斬女子及幼弱以賞軍士遂平石樓石樓絕險自魏代所不能至於是遠近山胡莫不懾伏是役也有都督戰傷其什長路暉禮不能救帝命

剗其五藏使九人分食之肉及穢惡皆盡自是始行威虐是月周文帝廢西魏帝而立齊王廓是為恭帝三月蠕蠕菴羅辰叛帝親討大破之辰父子北遁太保賀拔仁坐違緩拔其髮免為庶人使負炭輸晉陽宮夏四月蠕蠕寇肆州丁巳帝自晉陽討之至恒州時虜騎散走大軍已還帝帥麾下二千餘騎為殿夜宿黃瓜堆蠕蠕別部數萬騎扣鞍而進四面圍逼帝安睡平明方起神色自若指畫軍形潰圍而出虜走追擊之伏尸二十里獲菴羅辰妻子生口三萬餘五月丁亥地豆干契丹並遣使朝貢丁未北討蠕蠕又大破之六月蠕蠕遠遁秋七月戊子蕭慎遣使朝貢壬辰降罪人庚戌至自北伐八月庚午以司州牧清河王岳為太保以安德王軌為大司馬以扶風王可朱渾道元為大將軍以司空尉粲為司徒以太子少師侯莫陳相為司空以尚書令平陽王淹為錄尚書

事以常山王演為尚書令以上黨王渙為尚書右僕射丁丑行幸晉陽辛巳錄尚書事平原王高隆之薨封冀州刺史段韶為平原王是月詔常山王演上黨王渙清河王岳平原王段韶率眾於洛陽西南築伐惡城新城嚴城河南城四鎮九月帝親自臨幸欲以致西師西師不出乃如晉陽冬十月西魏攻陷江陵殺梁元帝梁將王僧辯在建鄴推其晉安王蕭方智為太宰都督中外諸軍事承制置百官十二月庚申車駕北巡至達速嶺親覽山川險要將起長城是歲西魏恭帝元年

六年春正月壬寅清河王岳度江尅夏首梁司徒郢州刺史陸法和請降詔以梁貞陽侯蕭明為梁主遣尚書右僕射上黨王渙送之江南二月甲子以陸法和為使持節都督十州諸軍事太尉大都督西南道大行臺三月景戌上黨王渙尅東關斬梁將裴之橫

景申車駕至自晉陽封文襄二子孝珩爲廣寧王延宗爲安德王
戊戌帝臨昭陽殿決獄是月發寡婦以配軍士築長城夏五月蕭
明入於建業六月甲子河東王潘相樂薨壬申帝親討蠕蠕甲戌
諸軍大會祁連池乙亥出塞至庫狄谷百餘里無水泉六軍渴乏
俄而大雨秋七月己卯帝頓白道留輜重親率輕騎五千追蠕蠕
壬午及之懷朔鎮帝躬犯矢石頻大破之遂至沃野壬辰還晉陽
九月己卯車駕至自晉陽冬十月梁將陳霸先襲殺王僧辯廢蕭
明復立蕭方智爲主辛亥行幸晉陽十一月梁秦州刺史徐嗣徽
南豫州刺史任約等襲據石頭城並以州內附壬辰大都督蕭軌
帥衆至江遣都督柳達摩等度江鎮石頭己亥太保清河王岳薨
柳達摩爲霸先攻逼以石頭降是歲高麗庫莫奚並遣使朝貢詔
發夫一百八十萬築城自幽州北夏口西至恒州九百餘里

七年春正月辛丑封司空侯莫陳相爲白水郡王車駕至自晉陽
於鄴城西馬射大集衆庶觀之二月辛未詔常山王演等於涼風
堂讀尚書奏案論得失帝親決之三月丁酉大都督蕭軌等帥
衆濟江夏四月乙丑儀同三司婁叡討魯陽蠻大破之丁卯造金
華殿五月漢陽王洽薨帝以肉爲斷慈遂不復食六月乙卯蕭軌
等與梁師戰於鍾山西遇霖雨失利軌及都督李希光王敬寶東
方老軍司裴英起竝沒士卒還者十二三乙丑梁湘州刺史王琳
獻馴象秋七月乙亥周文帝殂是月發山東寡婦二千六百人配
軍士有夫而濫奪者十二三十一月壬子併省州三郡一百五十
三縣五百八十九鎮三戌二十六十二月庚子魏恭帝遜位於周
是歲庫莫奚契丹遣使朝貢修廣三臺宮殿先是自西河總秦戍
築長城東至海前後所築東西凡三千餘里六十里一戍其要害

置州鎮凡二十五所

八年春三月大熱人或暍死夏四月庚午詔禁取蝦蟹蜆蛤之類
唯許私家捕魚乙酉詔公私禁取鷹鷂以太師咸陽王斛律金為
右丞相以前大將軍扶風王可朱渾道元為太傅以開府儀同三
司賀拔仁為太保尚書令常山王演為司空以錄尚書事長廣王
湛為尚書令以尚書右僕射楊愔為左僕射以并省尚書右僕射
崔暹為左僕射以上黨王渙為錄尚書事是月帝在城東馬射敕
京師士女悉赴觀不赴者罪以軍法七日乃止五月辛酉冀州人
劉向於鄴謀逆黨與皆伏誅秋八月己巳庫莫奚遣使朝貢庚辰
詔丘郊禘祫時祭皆市取少牢不得割割有司監視必令豐備農
社先蠶酒肉而已雩禱風雨司人司祿靈星雜祀果餅酒脯唯當
務盡誠敬義同如在辛巳制權酤自夏至九月河北六州河南十

三州畿內八郡大蝗飛至鄴蔽日聲如風雨甲辰詔今年遭蝗處
免租冬十月乙亥梁主蕭方智遜位於陳陳武帝遣使稱藩朝貢
是歲周閔帝元年周冢宰宇文護殺閔帝而立明帝又改元焉初
於長城內築重城自庫洛拔而東至於塢紇戍凡四百餘里
九年春二月丁亥降罪人已丑詔燎野限以仲冬不得他時行火
損昆蟲草木三月丁酉車駕至自晉陽夏四月辛巳大赦是月比
豫州刺史司馬消難以城叛于周大旱帝以祈雨不降毀西門豹
祠掘其冢五月辛丑以尚書令長廣王湛為錄尚書事以驃騎大
將軍平秦王暹彥為右僕射甲辰以前左僕射楊愔為尚書令六
月乙丑帝自晉陽北巡己巳至祁連池戊寅還晉陽是夏山東大
蝗差人夫捕而坑之秋七月辛丑給畿內老人劉奴等九百四十
三人版職及杖帽各有差戊申詔趙燕瀛定南營五州及司州廣

平清河二郡去年蝻澇損田兼春夏少雨苗稼薄者免今年租稅
八月乙丑車駕至自晉陽甲戌行幸晉陽先是發丁匠三十餘萬
入營三臺于鄴因其舊基而高博之大起宮室及遊豫園至是三
臺成改銅爵曰金鳳金武曰聖應冰井曰崇光冬十一月甲午車
駕至自晉陽登三臺御乾象殿朝宴羣臣以新宮成丁酉大赦內
外文武官竝進一大階丁巳梁相州刺史王琳遣使請立蕭莊為
梁主仍以江州內屬令莊居之十二月癸酉詔以梁王蕭莊為梁
主進居九派戊寅以太傅可朱渾道元為太師以司徒尉粲為太
尉以冀州刺史段韶為司空以錄尚書事常山王演為大司馬以
錄尚書事長廣王湛為司徒起大莊嚴寺是歲殺永安王浚上黨
王渙

十年春正月戊戌以司空侯莫陳相為大將軍辛丑太尉長樂郡

公尉粲肆州刺史濮陽公婁仲遠並進爵為王甲寅行幸遼陽甘
露寺二月景戌帝於甘露寺禪居深觀唯軍國大政奏聞三月戊
戌以侍中高德正為尚書右僕射景辰車駕至自遼陽是月梁王
蕭莊至郢州遣使朝貢夏閏四月丁酉以司州牧彭城王浟為兼
司空以侍中高陽王湜為尚書左僕射乙巳以兼司空彭城王浟
為兼太尉攝司空事封皇子紹廉為長樂王五月癸未誅始平公
元世東平公元景式等二十五家禁止特進元韶等十九家尋竝
誅之男子無少長皆斬所殺三千人竝投漳水六月陳武帝殂秋
八月戊戌封皇子紹義為廣陽王以尚書右僕射河間王孝琬為
左僕射癸卯詔諸軍人或父祖改姓冒入元氏或假託攜認妄
稱姓元者不問世數遠近悉聽改復本姓是月殺左僕射高德正
九月己巳行幸晉陽冬十月甲午帝暴崩於晉陽宮德陽堂時年

三十一遺詔凶事一從儉約喪月之斷限以三十六日嗣子百寮
內外遐邇奉制割情悉從公除癸卯發喪歛於宣德殿十一月辛
未梓宮還鄴十二月乙酉殯於太極前殿乾明元年二月景申葬
於武寧陵謚曰文宣帝廟號顯祖帝沈敏有遠量外若不遠內鑒
甚明文襄年長英秀神武特所愛重百僚承風莫不震懼而帝善
自晦迹言不出口恒自貶退言咸順從故深見輕雖家人亦以爲
不及文襄嗣業帝以次長見猜嫌帝后李氏色美每預宴會容貌
遠過靖德皇后文襄彌不平焉帝每爲后私營服翫小佳文襄卽
令逼取后恚有時未與帝笑曰此物猶應可求兄須何容恡文襄
或愧而不取便恭受亦無飾讓每退朝還第輒閉閣靜坐雖對妻
子能竟日不言或袒跣奔躍后問其故對曰爲爾漫戲此蓋習勞
而不肯言也所寢至夜曾有光巨細可察后驚告帝帝曰慎勿妄

言自此唯與后寢侍御皆令出外文襄崩祕不發喪其後漸露魏
帝竊謂左右曰大將軍此殂似是天意威權當歸王室矣及帝將
赴晉陽親入辭謁於昭陽殿從者千人居前持劔者十餘輩帝在
殿下數十步立而衛士升階已二百許人皆攘袂扣刃若對嚴敵
帝令主者傳奏須詣晉陽言訖再拜而出魏帝失色目送帝曰此
人似不能見容吾不知死在何日及至并州慰諭將士指辭款實
衆皆欣然曰誰謂左僕射翻不減令公公卽指文襄也時訛言
上黨出聖人帝聞之將徙一郡而郡人張思進上言殿下生於南
宮坊名上黨卽是上黨出聖人帝悅而止先是童謠曰一束藁兩
頭然河邊殺癩飛上天藁然兩頭於文爲高河邊殺癩爲水邊羊
指帝名也於是徐之才盛陳宜受禪帝曰先父亡兄功德如此尚
終北面吾又何敢當之才曰正爲不及父兄須早升九五如其不

作人將生心且讖云羊飲盟津角拄天盟津水也羊飲水王名也角拄天大位也又陽平郡界回星驛傍有大水土人常見羣羊數百立臥其中就視不見事與讖合願王勿疑帝以問高德正德正又贊成之於是始決乃使李密卜之遇大橫曰大吉漢文帝之封也帝乃鑄象以下之一寫而成使段韶問斛律金於肆州金來朝深言不可以鎧曹宗景業首陳符命請殺之乃議於太后前太后謂諸貴曰我兒瓘直必自無此意直高德正樂禍教之耳帝意決乃整兵而東使高德正之鄴諷喻公卿莫有應者司馬子如逆帝於遼陽固言未可杜弼亦抱馬諫帝欲還尚食丞李集曰此行事非小而言還帝僞言使向東門殺之而別令賜絹十疋四月夜禾生於魏帝銅研且長數寸有穗五月帝復東赴鄴令左右曰異言者斬是月光州獻九尾狐帝至鄴城南召入并齋板策旦高隆之

進謁曰用此何爲帝作色曰我自事若欲族滅耶隆之謝而退於是乃作圓丘備法物草禪讓事及登極之後神明轉茂外柔內剛果於斷割人莫能窺又特明吏事留心政術簡靖寬和坦於任使故楊愔等得盡於匡贊朝政粲然兼以法馭下不避權貴或有違犯不容勳戚內外莫不肅然至於軍國機策獨決懷抱規謀宏遠有人君大略又以三方鼎峙繕甲練兵左右宿衛置百保軍士每臨行陣親當矢石鋒刃交接唯恐前敵不多屢犯艱厄常致尅捷嘗追及蠕蠕令都督高阿那肱率騎數千塞其走道時虜軍猶盛五萬餘人肱以兵少請益帝更減其半騎那肱奮擊遂大破之虜主踰越巖谷僅以身免都督高元海王師羅並無武藝先稱怯弱一旦交鋒有踰驍壯嘗於東山遊宴以關隴未平投盃震怒召魏收於前立爲詔書宣示遠近將士西行是歲周文帝殂西人震恐

常爲度隴之計旣征伐四尅威振戎夏六七年後以功業自矜遂留情耽酒肆行淫暴或躬自鼓舞歌謳不息從旦通宵以夜繼晝或袒露形體塗傅粉黛散髮胡服雜衣錦綵拔刃張弓游行市肆勲戚之第朝夕臨幸時乘鹿車白象駱駝牛驢並不施鞍勒或盛暑炎赫日中暴身隆冬酷寒去衣馳走從者不堪帝居之自若街坐巷宿處處游行多使劉桃枝崔季舒負之而行或擔胡鼓而拍之親戚貴臣左右近習侍從錯雜無復差等徵集淫媼悉去衣裳分付從官朝夕臨視或聚棘爲馬紐草爲索逼遣乘騎牽引來去流血灑地以爲娛樂凡諸殺害多令支解或焚之於火或投之於河沈酗旣久彌以狂惑每至將醉輒拔劍挂手或張弓傳矢或執持牟槊游行市廛問婦人曰天子何如答曰顛顛癡癡何成天子帝乃殺之或馳騁衢路散擲錢物恣人拾取爭競諠譁方以爲喜

太后嘗在北宮坐一小榻帝時已醉手自舉牀后便墜落頗有傷損醒悟之後大懷慚恨遂令多聚柴火將入其中太后驚懼親自持挽又設地席令平秦王高歸彥執杖口自責疏脫背就罰敕歸彥杖不出血當卽斬汝太后涕泣前自抱之帝流涕苦請不肯受於太后太后聽許方捨背杖笞脚五十莫不至到衣冠拜謝悲不自勝因此戒酒一旬還復如初自是耽酒轉劇遂幸李后家以鳴鏑射后母崔正中其頰因罵曰吾醉時尚不識太后老婢何事馬鞭亂打一百有餘三臺構木高二十七丈兩棟相距二百餘尺工匠危怯皆繫繩自防帝登脊疾走都無怖畏時復雅舞折旋中節傍人見者莫不寒心又召死囚以席爲翅從臺飛下免其罪戮果敢不慮者盡皆獲全疑怯猶豫者或致損跌沈酗旣久轉虧本性怒大司農穆子容使之脫衣而伏親射之不中以概貫其下竅入

腸雖以楊愔爲宰輔使進廁等以其體肥呼爲楊大肚馬鞭鞭其背流血浹袍以刀子斃其腹崔季舒託俳言曰老小公子惡戲因掣刀子而去之又置愔於棺中載以輜車幾下釘者數四曾至彭城王浹宅謂其母爾朱曰憶汝辱我母壻時向何由可耐手自刃殺又至故僕射崔暹第謂暹妻李曰頗憶暹不李曰結髮義深實懷追憶帝曰若憶時自往看也親自斬之棄頭墻外嘗在晉陽以稍戲刺都督尉子耀應手而死在三臺太光殿上鋸殺都督穆嵩又幸開府暴顯家有都督韓哲無罪忽衆中召斬之數段魏安樂王元昂后之姊壻其妻有色帝數幸之欲納爲昭儀召昂令伏以鳴鏑射一百餘下凝血垂將一石竟至於死後帝自往弔哭於喪次逼擁其妻仍令從官脫衣助礎兼錢綵號爲信物一日所得將踰巨萬后啼不食乞讓位於姊太后又爲言帝意乃釋所幸薛嬪

甚被寵愛忽意其經與高岳私通無故斬首藏之於懷於東山宴勸酬始合忽探出頭投於梓上又解其屍弄其髀髀一作爲琵琶一座驚怖莫不喪膽帝方收取對之流淚云佳人難再得甚可惜也載屍以出被髮步哭而隨之至有閭巷庸人無識知者忽令召斬鄴下繫徒罪至大辟簡取隨駕號爲供御囚手自刃殺持以爲戲凡所屠害動多支解或投之烈火或棄之漳流兼以外築長城內營臺殿賞費過度天下騷然內外惛惛各懷怨毒而素嚴斷臨下加之默識強記百僚戰慄不敢爲非曾有典御丞李集面諫比帝有甚於桀紂帝令縛置流中沈沒久之復令引出謂曰吾何如桀紂集曰回來彌不及矣帝又令沈之引出更問如此數四集對如初帝大笑曰天下有如此癡漢方知龍逢比干非是俊物遂解放之又被引入見似有所諫帝令將出要斬其或斬或赦莫能測焉初

帝登阼改年爲天保士有深識者曰天保之字爲一大人只十帝其不過十乎又先是謠云馬子入石室三千六百日帝以午年生故曰馬子三臺石季龍舊居故曰石室三千六百日十年也又帝曾問太山道士曰吾得幾年爲天子答曰得三十年道士出後帝謂李后曰十年十月十日得非三十也吾甚畏之過此無慮人生有死何得致惜但憐正道尚幼人將奪之耳帝及期而崩濟南竟不終位時以爲知命曾幸晉陽夜宿杜門嶺嶺有數株栢樹皆將千年枝葉嫩茂似有神物所託時帝已被酒向嶺顛罵射中一株未幾立枯而死又出言屢中時人故謂之神靈雖爲猖獗不專云昏暴末年遂不能進食唯數飲酒麴蘖成災因而致斃先是霍州發楚夷王女冢尸如生焉得珠襦玉匣帝珍之還以斂焉如祖珽以險薄多過帝數罪之每謂爲老賊及武成時珽被任遇乃語武

成曰文宣甚暴何得稱文旣非創業何得稱祖若宣帝爲祖陛下萬歲後將何以稱武成溺於珽說天統初有詔改謚景烈廟號威宗武平初趙彥深執政又奏復帝本謚廟號顯祖云廢帝殷字正道小名道人文宣帝之長子也母曰李皇后天保元年立爲皇太子時年六歲性敏慧初學反語於跡字下注云自反時侍者未達其故太子曰跡字足傍亦爲跡豈非自反邪嘗宴北宮獨令河間王勿入左右問其故太子曰世宗遇賊處河間王復何宜在此文宣每言太子得漢家性質不似我欲廢之立太原王初詔國子博士李寶鼎傳之寶鼎卒復詔國子博士邢峙侍講太子雖富於春秋而溫裕開朗有人君之度貫綜經業省覽時政甚有美名七年冬文宣召朝臣文學者及禮學官於宮宴會令以經義相質親身臨聽太子手筆措問在坐莫不歎美九年文宣在晉陽太子監國

跡字足傍亦
爲跡云

集諸儒講孝經令楊愔傳旨謂國子助教許散愁曰先生在世何以自資對曰散愁自少以來不登變童之牀不入季女之室服膺簡策不知老之將至平生素懷若斯而已太子曰顏子縮屋稱貞柳下嫗而不亂未若此翁白首不娶者也乃賚絹百疋後文宣登金鳳臺召太子使手刃囚太子惻然有難色再三不斷其首文宣怒親以馬鞭撞太子三下由是氣悸語吃精神時復昏擾十年十月文宣崩癸卯太子卽帝位於晉陽宣德殿大赦內外百官普加汎級亡官失爵聽復資品庚戌尊皇太后爲太皇太后皇后爲皇太后詔九州軍人七十已上授以板職武官年六十已上及癱病不堪驅使者並皆放免土木營造金銅鐵諸雜作工一切停罷十一月乙卯以右丞相咸陽王斛律金爲左丞相以錄尚書事常山王演爲太傅以司徒長廣王湛爲太尉以司空段韶爲司徒以平

陽王淹爲司空高陽王湜爲尚書左僕射河間王孝琬爲司州牧侍中燕子獻爲右僕射戊午分命使者巡省四方求政得失省察風俗問人疾苦十二月戊戌改封上黨王紹仁爲漁陽王廣陽王紹義爲范陽王長樂王紹廣爲隴西王是歲周武成元年

乾明元年春正月癸丑朔改元己未詔寬徭賦癸亥高陽王湜薨是月車駕至自晉陽己亥以太傅常山王演爲太師錄尚書事以太尉長廣王湛爲大司馬并省錄尚書事以尚書左僕射平秦王歸彥爲司空趙郡王叡爲尚書左僕射詔諸元良口配沒宮內及賜人者並放免甲辰帝幸芳林園親錄囚徒死罪已下降免各有差乙巳太師常山王演矯詔誅尚書令楊愔尚書右僕射燕子獻領軍大將軍可朱渾天和侍中宋欽道散騎常侍鄭子默戊申以常山王演爲大丞相都督中外諸軍錄尚書事以大司馬長廣王

湛爲太傅京畿大都督以司徒段韶爲大將軍以前司空平陽王湛爲太尉以司空平秦王埽彥爲司徒彭城王浹爲尚書令又以高麗王世子湯爲使持節領東夷校尉遼東郡公高麗王是月王琳爲陳所敗蕭莊自拔至和州三月甲寅詔軍國事皆申晉陽稟大丞相常山王規笄壬申封文襄第二子孝珩爲廣寧王第三子長恭爲蘭陵王夏四月癸亥詔河南定冀趙瀛滄南膠光南青九州往因蝨水頗傷時稼遣使分塗贍恤是月周明帝崩五月壬子以開府儀同三司劉洪徽爲尚書右僕射秋八月壬午太皇太后令廢帝爲濟南王全食一郡以大丞相常山王演入纂大統是日王居別宮皇建二年九月殂於晉陽時年十七帝聰慧夙成寬厚仁智天保間雅有令名及承大位楊愔燕子獻宋欽道等同輔以常山王地親望重內外畏服加以文宣初崩之日太后本欲立之

故愔等並懷猜忌常山王憂悵乃白太后誅其黨待平秦王埽彥亦預謀焉皇建二年秋天文告變埽彥慮有後害仍白孝昭以王當咎乃遣埽彥馳駟至晉陽害之王薨後孝昭不豫見文宣爲崇孝昭深惡之厭勝術備設而無益也薨三旬而孝昭崩大寧二年塋於武寧之西北謚閔悼王初文宣命邢邵制帝名殷字正道從而尤之殷家弟及正字一止吾身後兒不得也邵懼請改焉文宣不許曰天也因謂昭帝曰奪時但奪慎勿殺也

孝昭皇帝演字延安神武皇帝第六子文宣皇帝之母弟也幼而英峙早有大成之量武明皇太后早所愛重魏元象元年封常山郡公及文襄執政遣中書侍郎李同執就霸府爲諸弟師帝所覽文籍源其指埽而不好辭彩每歎云雖盟津之師左驂震而不劔以爲能遂篤志讀漢書至李陵傳恒壯其所爲焉聰敏過人所與

游處一知其家諱終身未嘗誤犯同軌病卒又命開府長流參軍
刁柔代之性嚴褊不適誘訓之宜中被遣出帝送出閣慘然歛容
淚數行下左右莫不歔歔其敬業重舊如此天保初進爵爲王五
年除并省尚書令帝善斷割長思理省內畏服七年從文宣還鄴
文宣以尚書奏事多有異同令帝與朝臣先論定得失然後敷奏
帝長於政術割斷咸盡其理文宣歎重之八年轉司空錄尚書事
九年除大司馬仍錄尚書事時文宣溺於游宴帝憂憤表於神色
文宣覺之謂帝曰但令汝在我何爲不縱樂帝唯啼泣拜伏竟無
所言文宣亦大悲抵盃於地曰汝似嫌我自今敢進酒者斬之因
取所御盃盡皆壞棄後益沈湎或入諸貴戚家角力批拉不限貴
賤唯常山王至內外肅然帝又密撰事條將諫其友王晞以爲不
可帝不從因閒極言遂逢大怒順成后魏本朝宗室文宣帝欲離

之陰爲帝廣求淑媛望移其寵帝雖承旨有納而情義彌重帝性
頗嚴尚書郎中剖斷有失輒加捶楚令史姦慝便即考竟文宣乃
立帝於前以刀環擬脇召被立罰者臨以白刃求帝之短咸無所
陳方見解釋自是不許笞箠郎中後賜帝魏時宮人醒而忘之謂
帝擅取遂令刀環亂築因此致困皇太后日夜啼泣文宣不知所
爲先是禁友王晞乃捨之令侍帝帝月餘漸瘳不敢復諫及文宣
崩帝居禁中護喪事幼主卽位乃卽朝班除太傅錄尚書事朝政
皆決於帝月餘乃居藩邸自是詔敕多不關帝客或言於帝曰鷲
鳥捨巢必有探卵之患今日之地何宜屢出乾明元年從廢帝赴
鄴居于領軍府時楊愔燕子獻可朱渾天和宋欽道鄭子默等以
帝威望旣重內懼權逼請以帝爲太師司州牧錄尚書事長廣王
湛爲大司馬錄并省尚書事解京畿大都督帝旣以尊親而見猜

斥乃與長廣王期獵謀之於野三月甲戌帝初上省旦發領軍府大風暴起壞所御車幔帝甚惡之及至省朝士咸集坐定酒數行於坐執尚書令楊愔石僕射燕子獻領軍可朱渾天和侍中宋欽道等於坐帝戎服與平原王段韶平秦王高曄彥領軍劉洪徽入自雲龍門於中書省前遇散騎常侍鄭子默又執之同斬於御府之內帝至東閣門都督成休寧抽刀呵帝帝令高曄彥喻之休寧厲聲大呼不從曄彥既為領軍素為兵士所服悉皆弛仗休寧方歎息而罷帝入至昭陽殿幼主太皇太后皇太后並出臨御坐帝奏愔等罪求伏專擅之辜時庭中及兩廊下衛士二千餘人皆被甲待詔武衛娥永樂武力絕倫又被文宣重遇撫刃思效廢帝吃訥兼倉卒不知所言太皇太后又為皇太后誓言帝無異志唯云逼而已高曄彥救勞衛士戒嚴永樂乃內刀而泣帝乃令曄彥引侍

衛之士向華林園以京畿軍入守門閣斬娥永樂於園詔以帝為大丞相都督中外諸軍錄尚書事相府佐史進位一等帝尋如晉陽有詔軍國大政咸諮決焉帝既當大位知無不為擇其令典考綜名實廢帝恭己以聽政太皇太后尋下令廢少主命帝統大業皇建元年八月壬午皇帝即位於晉陽宣德殿大赦改乾明元年為皇建詔奉太皇太后還稱皇太后皇太后稱文宣皇后宮曰昭信乙酉詔自太祖創業已來諸有佐命功臣子孫絕滅國統不傳者有司搜訪近親以名聞當量為主後諸郡國老人各授板職賜黃帽鳩杖又詔謬正之士竝聽進見陳事軍人戰亡死王事者以時申聞當加榮贈督將朝士名望素高位歷通顯天保以來未蒙追贈者亦皆錄奏又以廷尉中丞執法所在繩違案罪不得僞文弄法其官奴婢年六十已上免為庶人戊子以太傅長廣王湛為

右丞相以太尉平陽王淹爲太傅以尚書令彭城王浹爲大司馬
壬辰詔分遣大使巡省四方觀察風俗問人疾苦考求得失搜訪
賢良甲午詔曰昔武王尅殷先封往代兩漢魏晉無廢茲典及元
氏統歷不率舊章朕纂承大業思弘古典但二王三恪舊說不同
可議定是非列名條奏其禮儀體式亦仰議之又詔國子寺可備
立官屬依舊置生講習經典歲時考試其文襄帝所運右經宜卽
施列於學館外州太學亦仰典司勤加督課景申詔九州勲人有
重封者聽分授子弟以廣骨肉之恩九月壬申詔議定三祖樂冬
十一月辛亥立妃元氏爲皇后世子百年爲皇太子賜天下爲父
後者爵一級癸丑有司奏太祖獻武皇帝廟宜奏武德之樂舞昭
烈之舞太宗文襄皇帝廟宜奏文德之樂舞宣政之舞高祖文宣
皇帝廟宜奏文正之樂舞光大之舞詔曰可庚申詔以故太師尉

景故太師竇泰故太師太原王婁昭故太宰章武王庫狄干故太
尉段榮故太師万俟普故司徒蔡攜故太師高乾故司徒莫多婁
貸文故太保劉貴故太保封祖裔故廣州刺史王懷十三人配饗
太祖廟庭故太師清河王岳故太宰安德王韓軌故太宰扶風王
可朱渾道元故太師高昂故大司馬劉豐故太師万俟受洛干故
太尉慕容紹宗十一人配饗世宗廟庭故太尉河東王潘相樂故
司空薛修義故太傅破六韓常三人配饗高祖廟庭是月帝親戎
北討庫莫奚出長城虜奔遁分兵致討大獲牛馬括總入晉陽宮
十二月景午車駕至晉陽

二年春正月辛亥祀圓丘壬子禘於太廟癸丑詔降罪人各有差
二月丁丑詔內外執事之官從五品已上及三府主簿錄事參軍
諸王文學侍御史廷尉三官尚書郎中中書舍人每二年之內各

舉一人冬十月景子以尚書令彭城王浹爲太保長樂王尉粲爲太尉已酉野雉栖于前殿之庭十一月甲辰詔曰朕嬰此暴疾奄忽無逮今嗣子冲眇未開政術社稷業重理歸上德右丞相長廣王湛研機測化體道居宗人雄之望海內瞻仰同胞共氣家國所憑可遣尚書左僕射趙郡王叡喻旨徵王統茲大寶其喪紀之禮一同漢文三十六日悉從公除山陵施用務從儉約先是帝不豫而無闕聽覽是日崩於晉陽宮時年二十七太寧元年閏十二月癸卯梓宮還鄴上謚曰孝昭皇帝庚午葬于文靜陵帝聰敏有識度深沈能斷不可窺測身長八尺腰帶十圍儀望風表迥然獨秀自居臺省留心政術開明簿領吏所不逮及正位宸居彌所尅勵輕徭薄賦勤恤人隱內無私寵外收人物雖后父位亦特進無別日具臨朝務知人之善惡每訪問左右與獲直言曾問舍人裴澤

在外議論得失澤率爾對曰陛下聰明至公自可遠侔古昔而有識之士咸言傷細帝王之度頗爲未弘帝笑曰誠如卿言朕初臨萬機慮不周悉故致爾耳此事安可久行恐後又嫌疎漏澤因不寵遇其樂聞過也如此趙郡王叡與庫狄顯安侍坐帝曰須拔我同堂弟顯安我親姑子今序家人禮除君臣之敬可言我之不逮顯安曰陛下多妄言曰若何對曰陛下昔見文宣以馬鞭撻人常以爲非而今行之非妄言邪帝握其手謝之又使直言對曰陛下太細天子乃更似吏帝曰朕甚知之然無法來久將整之以至無爲耳文問王晞晞答如顯安皆從容受納性至孝太后不豫出居南宮帝行不正履容色貶悴衣不解帶殆將四旬殿去南宮五百餘步雞鳴而去辰時方還來去徒行不乘輿輦太后所苦小增便卽寢伏閣外食飲藥物盡皆躬親太后嘗心痛不自堪忍帝立侍

惟前以爪掐手心血流出袖友愛諸弟無君臣之隔雄勇有謀于時國富兵強將雪神武遺恨意在頓駕平陽爲進取之策遠圖不遂惜哉初帝與濟南約不相害及輿駕在晉陽武成鎮鄴望氣者云鄴城有天子氣帝恐濟南復興乃密行鴆毒濟南不從乃扼而殺之後頗愧悔初苦內熱頻進渴散時有尚書令史姓趙於鄴見文宣從楊愔燕子獻等西行言相與復讐帝在晉陽宮與毛夫人亦見焉遂漸危篤備禳厭之事或煮油四灑或持炬燒逐諸厲方出殿梁山騎棟上歌呼自若了無懼容時有天狗下乃於其所講武以厭之有兔驚馬帝墜而絕肋太后視疾問濟南所在者三帝不對太后怒曰殺去邪不用吾言死其宜矣臨終之際唯扶服牀枕叩頭求哀遣使詔追長廣王入纂大統又手書云宜將吾妻子置一好處勿學前人也

論曰神武平定四方威權在已遷鄴之後雖主祭有人號令所加政皆自出文宣因循鴻業內外叶從自朝及野羣心屬望東魏之地舉國樂推曾未期月遂登宸極始則存心政事風化肅然數年之間朝野安乂其後縱酒肆欲事極猖狂昏邪殘暴近代未有饗國不永實由斯疾濟南繼業大革其弊風教粲然搢紳稱幸股肱輔弼雖懷厥誠旣不能贊弘道德和睦親懿又不能遠慮防身深謀衛主應斷不斷自取其災臣旣誅夷君尋廢辱皆任非其器之所致爾孝昭早居臺閣故事通明人吏之間無所不委文宣崩後大革前弊及臨尊極留心更深時人服其明而譏其細也情好稽古率由禮度將封先代之胤且敦學校之風徵召才賢文武畢集于時周氏朝政移於宰臣主將相猜不無危殆乃睠關右寔懷兼并之志經謀宏曠諒近代之明主而降年不永其故何哉豈幽顯

之塗別有復報將齊之基宇止在於斯帝欲大之天不許也

北史卷七 齊本紀中第七 終

魏書卷七

北史卷八

齊本紀下第八

魏書卷八

世祖武成皇帝諱湛神武皇帝第九子孝昭皇帝之母弟也儀表瓌傑神武尤所鍾愛神武方招懷荒遠乃為帝娉蠕蠕太子菴羅辰女號隣和公主帝時年八歲冠服端嚴神情閑遠華戎歎異元象中封長廣郡公天保初進爵為王拜尚書令尋兼司徒遷太尉乾明初楊愔等密相疎忌以帝為大司馬領并州刺史帝既與孝昭謀誅諸執政遷太傅錄尚書事領京畿大都督皇建初進位右丞相孝昭幸晉陽帝以懿親居守鄴政事咸見委託二年孝昭崩遺詔徵帝入統大位及晉陽宮發喪於崇德殿皇太后令所司宣遺詔左右丞相斛律金率百僚敦勸三奏乃許之大寧元年冬十一月癸丑皇帝即位於南宮大赦改皇建二年為

大寧乙卯以司徒平秦王歸彥爲太傅以尚書右僕射趙郡王叡
爲尚書令以太尉粲爲太保以尚書令段韶爲大司馬以豐州
刺史婁叡爲司空以太傅平陽王淹爲太宰以太保彭城王浹爲
太師錄尚書事以冀州刺史博陵王濟爲太尉以中書監任城王
湣爲尚書左僕射以并州刺史斛律光爲右僕射封孝昭皇帝太
子百年爲樂陵郡王庚申詔大使巡行天下求政善惡問人疾苦
擢進賢良是歲周武帝保定元年

河清元年春正月乙亥車駕至自晉陽辛巳祀南郊壬午享太廟
景成立妃胡氏爲皇后子緯爲皇太子戊子大赦內外百官普加
汎級諸爲父後者賜爵一級己亥以前定州刺史馮翊王潤爲尚
書左僕射詔普斷屠殺以順春令二月丁未以太宰平陽王淹爲
青州刺史太傅領司徒以領軍大將軍宗師平秦王歸彥爲太宰

冀州刺史乙卯以兼尚書令任城王湣爲司徒詔散騎常侍崔瞻
聘于陳夏四月辛丑皇太后婁氏崩乙巳青州刺史上言今月庚
寅河濟清以河濟清改大寧二年爲河清降罪人各有差五月甲
申祔葬武明皇后於義平陵己丑以尚書右僕射斛律光爲尚書
令秋七月太宰冀州刺史平秦王歸彥據州反詔大司馬段韶司
空婁叡討禽之乙未斬歸彥并其三子及黨與二十人於都市丁
酉以大司馬段韶爲太傅以司空婁叡爲司徒以太傅平陽王淹
爲太宰以尚書令斛律光爲司空以太子太傅趙郡王叡爲尚書
令中書監河間王孝琬爲尚書左僕射癸亥行幸晉陽陳人來聘
冬十一月丁丑詔兼散騎常侍封孝琰使於陳十二月景辰車駕
至自晉陽是歲殺太原王紹德
二年春正月乙亥帝詔臨朝堂策試秀孝以太子少傅魏收爲兼

尚書右僕射已卯兼右僕射魏收以阿縱除名丁丑以武明皇后配祭北郊辛卯帝臨都亭錄見囚降在京罪人各有差三月己丑詔司空斛律光督五營軍士築戍於軹關壬申室韋國遣使朝貢景戌以兼尚書右僕射趙彥深爲左僕射夏四月并汾晉東雍南汾五州蟲旱傷稼遣使賑恤戊午陳人來聘五月壬午詔以城南雙堂之苑迴造大總持寺六月乙巳齊州上言濟河水口見八龍升天乙卯詔兼散騎常侍崔子武使于陳庚申司州牧河南王孝瑜薨秋八月辛丑詔以三臺宮爲大興聖寺冬十二月癸巳陳人來聘已酉周將楊忠帥突厥阿史那可汗等二十餘萬人自恒州分爲三道殺掠吏人是時大雨雪連月南北千餘里平地數尺霜晝下雨血於太原戊午帝至晉陽己未周軍逼并州又遣大將達奚武帥衆數萬至東雍及晉州與突厥相應是歲室韋庫莫奚

韃韃契丹並遣使朝貢

三年春正月庚申朔周軍至城下而陳戰於城西周軍及反突厥大敗人畜死者相枕數百里不絕詔平原王段韶追出塞而還三月辛酉以律令班下大赦己巳盜殺太師彭城王浹庚辰以司空斛律光爲司徒以侍中武興王普爲尚書左僕射甲申以尚書令馮翊王潤爲司空夏四月辛卯詔兼散騎常侍皇甫亮使於陳五月甲子帝至自晉陽壬午以尚書令趙郡王劼爲錄尚書事以前司徒婁叡爲太尉甲申以太傅段韶爲太師丁亥以太尉任城王潛爲大將軍壬辰行幸晉陽六月庚子大雨晝夜不息至甲辰乃止是月晉陽訛言有鬼兵百姓競擊銅鐵以捍之殺樂陵王百年婦宇文媪于周秋九月乙丑封皇子綽爲南陽王儼爲東平王是月婦閻媪于周陳人來聘突厥寇幽州入長城虜掠而還閏月乙未

詔遣十二使巡行水滂州免其租調乙巳突厥寇幽州周軍三道並出使其將尉迴寇洛陽楊標入軹關權景宣趣懸瓠冬十一月甲午迴等圍洛陽戊戌詔兼散騎常侍劉逖使於陳甲辰太尉婁叡大破周宣於軹關禽楊標十二月乙卯豫州刺史王士良以城降周將權景宣丁巳帝自晉陽南討巳未太宰平陽王淹薨壬戌太師段韶大破尉迴等解洛陽圍丁卯帝至洛陽免洛州經周軍處一年租賦赦州城內死罪巳下囚巳巳以太師段韶爲太宰以司徒斛律光爲太尉并州刺史蘭陵王長恭爲尚書令壬申帝至武牢經滑臺次於黎陽所經減降罪人景子車駕至自洛陽是歲高麗靺鞨新羅並遣使朝貢山東大水饑死者不可勝計詔發賑給事竟不行

四年春正月癸卯以大將軍任城王潛爲大司馬辛未幸晉陽二

月甲寅詔以新羅國王金真興爲使持節東夷校尉樂浪郡公新羅王壬申以年穀不登禁酤酒巳卯詔減百官食稟各有差三月戊子詔給西兗梁滄趙州司州之東郡陽平清河武都冀州之長樂勃海遭水滂之處貧下戶粟各有差家別斗升而已又多不付是月彗星見有物隕於殿廷如赤漆鼓帶小鈴殿上石自起兩兩相對又有神見於後園萬壽堂前山穴中其體壯大不辨其面兩齒絕白長出於脣帝直宿嬪御巳下七百人咸見焉帝又夢之夏四月戊午大將軍東安王婁叡坐事免乙亥陳人來聘太史奏天文有變其占當有易王景子乃使太宰段韶兼太尉持節奉皇帝璽綬傳位於皇太子大赦改元爲天統元年百官進級降罪各有差又詔皇太子妃斛律氏爲皇后於是羣公上尊號爲太上皇帝軍國大事咸以奏聞始將傳政使內參乘子尚乘驛送詔書於鄴

子尚出晉陽城見人騎隨後忽失之尚未至鄴而其言已布矣天
統四年十二月辛未太上皇帝崩於鄴宮乾壽堂時年三十二謚
曰武成皇帝廟號世祖五年二月甲申葬於永平陵
後主諱緯字仁綱武成皇帝之長子也母曰胡皇后夢於海上坐
玉盆日入裙下遂有娠天保七年五月五日生帝於并州邸帝少
美容儀武成特所愛寵拜世子及武成入纂大業太寧二年正月
景戌立爲皇太子河清四年武成禪位於帝

天統元年夏四月景子皇帝卽位於晉陽宮大赦改河清四年爲
天統丁丑以太保賀拔仁爲太師太尉侯莫陳相爲太保司空馮
翊王潤爲司徒錄尚書事趙郡王叡爲司空尚書左僕射河間王
孝琬爲尚書令戊寅以瀛州刺史尉粲爲太尉斛律光爲大將軍
東安王婁叡爲太尉尚書右僕射趙彥深爲左僕射六月壬戌彗

星出文昌東北其大如手後稍長乃至丈餘百日乃滅己巳太上
皇帝詔兼散騎常侍王季高使於陳秋七月乙未太上皇帝詔增
置都水使者一人冬十一月癸未太上皇帝至自晉陽己丑太上
皇帝詔改太祖獻武皇帝爲神武皇帝廟號高祖獻明皇后爲武
明皇后其父文宣謚號委有司議定十二月庚戌太上皇帝狩於
北郊壬子狩於南郊乙卯狩於西郊壬戌太上皇帝幸晉陽丁卯
帝至自晉陽庚午有司奏改高祖文宣皇帝爲威宗景烈皇帝是
歲高麗契丹靺鞨並遣使朝貢河南大疫

二年春正月辛卯祀圓丘癸巳祫祭於太廟詔降罪人各有差景
申以吏部尚書尉瑾爲尚書右僕射庚子行幸晉陽二月庚戌太
上皇帝至自晉陽壬子陳人來聘三月乙巳太上皇帝詔以三臺
施興聖寺以旱故降禁囚夏四月陳文帝殂五月乙酉以兼尚書

北史八
五
左僕射武興王普爲尚書令己亥封太上皇帝子儼爲東平王仁
弘爲齊安王仁固爲北平王仁英爲高平王仁光爲淮南王六月
太上皇帝詔兼散騎常侍韋道儒聘於陳秋八月太上皇帝幸晉
陽冬十月乙卯以太保侯莫陳相爲太傅大司馬任城王湝爲太
保太尉婁叡爲大司馬徙馮翊王潤爲太尉開府儀同三司韓祖
念爲司徒十一月大雨雪盜竊太廟御服十二月乙丑陳人來聘
是歲殺河間王孝琬突厥鞞鞞國並遣使朝貢於周爲天和元年
三年春正月壬辰太上皇帝至自晉陽乙未大雪平地二尺戊戌
太上皇帝詔京官執事散官三品已上舉三人五品已上各舉二
人稱事七品已上及殿中侍御史尚書都檢校御史主書及門下
錄事各舉一人鄴宮九龍殿災延燒西廊二月壬寅朔帝加元服
大赦九州職人各進四級內外百官普進二級夏四月癸丑太上

皇帝詔兼散騎常侍司馬幼之使於陳五月甲午太上皇帝詔以
領軍大將軍東平王儼爲尚書令乙未大風晝晦發屋拔樹六月
己未太上皇帝詔封皇子仁機爲西河王仁約爲樂浪王仁儉爲
潁川王仁雅爲安樂王統爲丹陽王仁謙爲東海王閏六月辛巳
左丞相斛律金薨壬午太上皇帝詔尚書令東平王儼錄尚書事
以尚書左僕射趙彥深爲尚書令并省尚書右僕射婁定遠爲尚
書左僕射中書監徐之才爲右僕射秋八月辛未太上皇帝詔以
太保任城王湝爲太師太尉馮翊王潤爲大司馬太宰段韶爲左
丞相太師賀拔仁爲右丞相太傅侯莫陳相爲太宰大司馬婁叡
爲大傅大將軍斛律光爲太保司徒韓祖念爲大將軍司空趙郡
王叡爲太尉尚書令東平王儼爲司徒九月己酉太上皇帝詔諸
寺署所綰雜保戶姓高者天保之初雖有優放權假力用未免者

今可悉蠲雜戶任屬郡縣一准平人丁巳太上皇帝幸晉陽是秋
山東大水人饑僵尸滿道冬十月突厥大莫婁宰韋百濟靺鞨等
國各遣使朝貢十一月景午以晉陽大明殿成故大赦文武百官
進二級免并州居城太原一郡來年租癸未太上皇帝至自晉陽
十二月巳巳太上皇帝詔以故左丞相趙郡王琛配饗神武廟廷
四年春正月壬子詔以故清河王岳河東王潘相樂十人並配饗
神武廟廷癸亥太上皇帝詔兼散騎常侍鄭大護使於陳三月乙
巳太上皇帝詔以司徒東平王儼爲大將軍南陽王綽爲司徒開
府儀同三司廣寧王孝珩爲尚書令夏四月辛未鄴宮昭陽殿災
及宣光瑤華等殿辛巳太上皇帝幸晉陽五月癸卯以尚書右僕
射胡長仁爲左僕射中書監和士開爲右僕射壬戌太上皇帝至
自晉陽自正月不雨至於是月六月甲子朔大雨甲申大風拔木

折樹是月彗星見于東井秋九月景申周人夾通和太上皇帝詔
侍中斛斯文略報聘于周冬十月辛巳以尚書令廣寧王孝珩爲
錄尚書事左僕射胡長仁爲尚書令右僕射和士開爲左僕射中
書監唐邕爲右僕射十一月壬辰太上皇帝詔兼散騎常侍李翥
使於陳是月陳安成王瑱廢其主伯宗而自立十二月辛未太上
皇帝崩景子大赦九州職人普加一級內外百官並加兩級戊寅
上太上皇后尊號爲皇太后甲申詔細作之務及所在百工並罷
之又詔掖廷晉陽中山宮人等及鄴下并州太官官口二處其年
六十已上及有癯患者仰所司簡放庚寅詔天保七年已來諸家
緣坐配流者所在令還是歲契丹靺鞨國並遣使朝貢
五年春正月辛亥詔以金鳳等三臺未入寺者施大興聖寺是月
殺定州刺史博陵王濟二月乙丑詔應宮刑者普免刑爲官口又

詔禁網捕鷹鷂及畜養籠放之物癸酉大莫婁國遣使朝貢己丑
改東平王儼爲琅邪王詔侍中叱列長又使於周是月殺太尉趙
郡王叡三月丁酉以司空徐顯秀爲太尉并省尚書令婁定遠爲
司空是月行幸晉陽夏四月甲子詔以并州尚書省爲大基聖寺
晉祠爲大崇皇寺乙丑車駕至自晉陽秋七月己丑詔降罪人各
有差戊申詔使巡省河北諸州無雨處境內偏旱者優免租調冬
十月壬戌詔禁造酒十一月辛丑詔以太保斛律光爲太傅大司
馬馮翊王潤爲太保大將軍琅邪王儼爲大司馬十二月庚午以
開府儀同三司蘭陵王長恭爲尚書令庚辰以中書監魏收爲尚
書右僕射

武平元年春正月乙酉朔改元太師并州刺史東安王婁叡薨戊
申詔兼散騎常侍裴獻之聘于陳二月癸亥以百濟王餘昌爲使
持節侍中驃騎大將軍帶方郡公王如故己巳以太傅咸陽王斛
律光爲右丞相并州刺史右丞相安定王賀拔仁爲錄尚書事冀
州刺史任城王湝爲太史景子降死罪己下囚閏月戊戌錄尚書
事安定王賀拔仁薨三月辛酉以開府儀同三司徐之才爲尚書
左僕射夏六月乙酉以廣寧王孝珩爲司空甲辰以皇子恒生故
大赦內外百官普進二級九州職人普進四級己酉詔以開府儀
同三司唐邕爲尚書右僕射秋七月癸丑封孝昭皇帝子彥基爲
城陽王彥康爲定陵王彥忠爲梁郡王甲寅以尚書令蘭陵王長
恭爲錄尚書事中領軍和士開爲尚書令癸亥靺鞨遣使朝貢癸
酉以華山王凝爲太傅八月辛卯行幸晉陽九月乙巳立皇子恒
爲皇太子冬十月辛巳以司空廣寧王孝珩爲司徒以上洛王思
宗爲司空封蕭莊爲梁王戊子曲降并州死罪己下囚己丑復改

威宗景烈皇帝謚號爲顯祖文宣皇帝十二月丁亥車駕至自晉陽詔左丞相斛律光出晉州道修城戍

二年春正月丁丑詔兼散騎常侍劉環儁使於陳戊寅以百濟王餘昌爲使持節都督東青州刺史二月壬寅以錄尚書事蘭陵王長恭爲太尉并省錄尚書事趙彥深爲司空尚書令和士開爲錄尚書事左僕射徐之才爲尚書令右僕射唐邕爲左僕射吏部尚書馮子琮爲右僕射夏四月壬午以大司馬琅邪王儼爲太保甲午陳遣使連和謀伐周朝議弗許六月段韶攻周汾州尅之獲刺史楊敷秋七月庚午太保琅邪王儼矯詔殺錄尚書事和士開於南臺卽日誅領軍大將軍庫狄伏連書侍御史王子宣等尚書右僕射馮子琮賜死殿中八月己亥行幸晉陽九月辛亥以太師任城王湝爲太宰馮翊王潤爲太師己未左丞相平原王段韶薨戊

午曲降并州界內死罪已下各有差庚午殺太保琅邪王儼壬申陳人來聘冬十月罷京畿府入領軍府己亥車駕至自晉陽十一月庚戌詔侍中赫連子悅使於周景寅以徐州行臺廣寧王孝珩爲錄尚書事庚午以錄尚書事廣寧王孝珩爲司徒癸酉以右丞相斛律光爲左丞相

三年春正月己巳祀南郊辛亥追贈故琅邪王儼爲楚帝二月己卯以衛菩薩爲太尉辛巳以并省吏部尚書高元海爲尚書右僕射庚寅以左僕射唐邕爲尚書令侍中祖珽爲左僕射是月敕撰玄洲苑御覽後改名聖壽堂御覽三月辛酉詔文武官五品已上各舉一人是月周誅冢宰宇文護夏四月周人來聘秋七月戊辰誅左丞相咸陽王斛律光及其弟幽州行臺荆山公豐樂八月庚寅廢皇后斛律氏爲庶人以太宰任城王湝爲右丞相太師馮翊王

潤爲太尉蘭陵王長恭爲大司馬廣寧王孝珩爲大將軍安德王延宗爲司徒使領將軍封輔相聘于周戊子拜右昭儀胡氏爲皇后已丑以司州牧北平王仁堅爲尚書令特進許季良爲左僕射彭城王寶德爲右僕射癸巳行幸晉陽是月聖壽堂御覽成敕付史閣後改爲修文殿御覽九月陳人來聘冬十月降死罪已下囚甲午拜弘德夫人穆氏爲左皇后大赦十二月辛丑廢皇后胡氏爲庶人是歲新羅百濟勿吉突厥並遣使朝貢於周爲建德元年四年春正月戊寅以并省尚書令高阿那肱爲錄尚書事庚辰詔兼散騎常侍崔象使於陳是月鄴都并州並有狐媚多截人髮二月乙巳拜左皇后穆氏爲皇后景午置文林館乙卯以尚書令北平王仁堅爲錄尚書事丁巳行幸晉陽是月周人來聘三月辛未盜入信州殺刺史和士休南兗州刺史鮮于世榮討之庚辰車駕

至晉陽夏四月戊午以大司馬蘭陵王長恭爲太保大將軍定州刺史南陽王綽爲大司馬大司馬太尉衛菩薩爲大將軍司徒安德王延宗爲太尉司空武興王普爲司徒開府儀同三司宜陽王趙彥深爲司空癸丑祈皇祠壇壇藪之內忽有車軌之轍案驗傍無人跡不知車所從來乙卯詔以爲大慶班告天下已未周人來聘五月景子詔史官更撰魏書癸巳以領軍穆提爲尚書左僕射以侍中中書監段孝言爲右僕射是月開府儀同三司尉破胡長孫洪略等與陳將吳明徹戰於呂梁南大敗破胡走以免洪略戰歿遂陷秦涇二州明徹進陷和合二州是月殺太保蘭陵王長恭六月明徹進軍圍壽陽壬子幸南苑從官賜死者六十人以錄尚書事高阿那肱爲司徒景辰詔開府王師羅使於周秋九月校獵於鄴東冬十月陳將吳明徹陷壽陽辛丑殺侍中崔季舒張彫

唐散騎常侍劉逖封孝琰黃門侍郎裴澤郭遵癸卯行幸晉陽十月
二月戊寅以司徒高阿那肱爲右丞相是歲高麗靺鞨並遣使朝
貢突厥使求婚

五年春正月乙丑置左右娥英各一人二月乙未車駕至自晉陽
朔州行臺南安王思好反辛丑行幸晉陽尚書令唐邕等大破思
好投火死焚其屍并其妻李氏丁未車駕至自晉陽甲寅以尚書
令唐邕爲錄尚書事夏五月大旱晉陽得死魃長二尺面頂各二
目帝聞之使刻木爲其形以獻庚申大赦丁亥陳人寇淮北秋八
月癸卯行幸晉陽甲辰以高勣爲尚書右僕射是歲殺南陽王綽
六年春三月乙亥車駕至自晉陽丁丑烹祆賊鄭子饒於都市是
月周人來聘夏四月庚子以中書監楊休之爲尚書右僕射癸卯
靺鞨遣使朝貢秋七月甲戌行幸晉陽八月丁酉冀定趙幽滄瀛

六州大水是月周師入洛川屯芒山攻逼洛城縱火船焚浮橋河
橋絕閏月己丑遣右丞相高阿那肱自晉陽禦之師次河陽周師
夜遁庚辰以司空趙彥深爲司徒斛律阿列羅爲司空辛巳以軍
國資用不足稅關市舟車山澤鹽鐵店肆輕重各有差開酒禁
七年春正月壬辰詔去秋以來水潦人饑不自立者所在付大寺
及諸富戶濟其性命甲寅大赦乙卯車駕至自晉陽二月辛酉括
雜戶女年二十已下十四已上未嫁悉集省隱匿者家長處死刑
二月景寅風從西北起發屋拔樹五日乃止夏六月戊申朔日有
蝕之庚申司徒趙彥深薨秋七月丁丑大雨霖是月以水滂遣使
巡撫流亡人戶八月丁卯行幸晉陽雉集於御坐獲之有司不敢
以聞詔營邯鄲宮冬十月景辰帝大狩於祁連池周師攻晉州癸
亥帝還晉陽甲子出兵大集晉祠庚午帝發晉陽癸酉帝列陣而

行上雞栖原與周齊王憲相對至夜不戰周師斂陣而退十一月周武帝退還長安留偏帥守晉州高阿那肱等圍晉州城戊寅帝至圍所十二月戊申周武帝來救晉州庚戌戰于城南齊軍大敗帝棄軍先還癸丑入晉陽憂懼不知所之甲寅大赦帝謂朝臣曰周師甚盛若何羣臣咸曰天命未改一得一失自古皆然宜停百賦安朝野收遺兵背城死戰以存社稷帝意猶預欲向北朔州乃留安德王延宗廣寧王孝珩等守晉陽若晉陽不守即欲奔突厥羣臣皆曰不可帝不從其言開府儀同三司賀拔伏恩封輔相慕容鍾葵等宿衛近臣三十餘人西奔周師乙卯詔募兵遣安德王延宗爲左廣廣寧王孝珩爲右廣延宗入見帝帝告欲向北朔州延宗泣諫不從帝密遣王康德與中人齊紹等送皇太后皇太子於北朔州景辰帝幸城南軍營勞將士其夜欲遁諸將不從丁巳

大赦改武平七年爲隆化元年其日穆提婆降周詔除安德王延宗爲相國委以備禦延宗流涕受命帝乃夜斬五龍門而出欲走突厥從官多散領軍梅勝郎叩馬諫乃迴之鄴時唯高阿那肱等十餘騎廣寧王孝珩襄城王彥道續至得數十人同行戊午延宗從衆議卽皇帝位於晉陽改隆化爲德昌元年庚申帝入鄴辛酉延宗與周師戰於晉陽大敗爲周師所虜帝遣募人重加官賞雖有此言而竟不出物廣寧王孝珩奏請出宮人及珍寶班賜將士帝不悅斛律孝卿居中受委帶甲以處分請帝親勞爲帝撰辭且曰宜慷慨流涕感激人心帝旣出臨衆將令之不復記所受言遂大笑左右亦羣哈將士莫不解體於是自大丞相已下太宰大司馬三師大將軍三公等官並增員而授或三或四不可勝數甲子皇太后從北道至引文武一品已上入朱華門賜酒食及紙筆問

以禦周之方略羣臣各異議帝莫知所從又引高元海宋士素盧
思道李德林等欲議禪位皇太子先是望氣者言當有革易於是
依天統故事授位幼主

幼主名恒帝之長子也母曰穆皇后武平元年六月生於鄴其年
十月立爲皇太子隆化二年春正月乙亥卽皇帝位時年八歲改
元爲承光元年大赦尊皇太后爲太皇太后帝爲太上皇帝后爲
太上皇后於是黃門侍郎顏之推中書侍郎薛道衡侍中陳德信
等勸太上皇帝往河外募兵更爲經略若不濟南投陳國從之丁
丑太皇太后太上皇自鄴先趣濟州周師漸逼癸未幼主又自鄴
東走己丑周師至紫陌橋癸巳燒城西門太上皇將百餘騎東走
乙亥度河入濟州其日幼主禪位於大丞相任城王湝令侍中斛
律孝卿送禪文及璽紱於瀛州孝卿乃以之歸周又爲任城王詔

尊太上皇爲無上皇幼主爲守國天王留太皇太后濟州遣高阿
那肱留守太上皇并皇后攜幼主走青州韓長鸞鄧顒等數十人
從太上皇旣至青州卽爲入陳之計而高阿那肱召周軍約生致
齊主而屢使人告言賊軍在遠已令人燒斷橋路太上所以停緩
周軍奄至青州太上窘急將遜於陳置金囊於鞍後與長鸞淑妃
等十數騎至青州南鄧村爲周將尉遲綱所獲送鄴周武帝與抗
賓王禮并太后幼主諸王俱送長安封帝溫國公至建德七年誣
與宜州刺史穆提婆謀反及延宗等數十人無少長咸賜死神武
子孫所存者一二而已至大象末楊休之陳德信等啟大丞相隋
公請收塋聽之塋於長安北原洪瀆川帝幼而令善及長頗學綴
文置文林館引諸文士焉而言語澁訥無志度不喜見朝士自非
寵私昵狎未嘗交語性悞不堪人視者卽有忿責其奏事者雖三

公令錄莫得仰視皆略陳大旨驚走而出每災異寇盜水旱亦不自貶損唯諸處設齋以此爲修德雅信巫覡解禱無方初琅邪王舉兵人告者誤云庫狄伏連反帝曰此必仁威也又斛律光死後諸武官舉高思好堪大將軍帝曰思好喜反皆如所言遂自以策無遺算乃益驕縱盛爲無愁之曲帝自彈胡琵琶而唱之侍和之者以百數人間謂之無愁天子嘗出見羣屬盡殺之或殺人剝面皮而視之任陸令萱和士開高阿那肱穆提婆韓長鸞等宰制天下陳德信鄧長顓何洪珍參預機權各引親黨超居非次官由財進獄以賄成其所以亂政害人難以備載諸官奴婢閹人商人胡戶雜戶歌舞人見鬼人濫得富貴者將以萬數庶姓封王者百數不復可紀開府千餘儀同無數領軍一時三十連判文書各作依字不具姓名莫知誰也諸貴寵祖禰追贈官歲一進位極乃止宮

掖婢皆封郡君宮女寶衣玉食者五百餘人一裙直萬疋鏡室直千金競爲變巧朝衣夕弊承武成之奢麗以爲帝王當然乃更增益宮苑造偃武修文臺其嬪嬙諸院中起鏡殿寶殿瑋瑁殿丹青彫刻妙極當時又於晉陽起十二院壯麗逾於鄴下所愛不恒數毀而又復夜則以火照作寒則以湯爲泥百工困窮無時休息鑿晉陽西山爲大佛像一夜燃油萬盆光照宮內又爲胡昭儀起大慈寺未成改爲穆皇后大寶林寺窮極工巧運石填泉勞費億計人牛死者不可勝紀御馬則藉以氈罽食物有十餘種將合牝牡則設青廬具牢饌而親觀之狗則飼以梁肉馬及鷹犬乃有儀同郡君之號故有赤彪儀同逍遙郡君陵霄郡君高思好書所謂馱龍逍遙著也犬於馬上設褥以抱之鬪雞亦號開府犬馬雞鷹多食縣幹鷹之入養者稍割犬肉以飼之至數日乃死又於華林園

立貧窮村舍帝自弊衣爲乞食兒又爲窮兒之市躬自交易寫築
西鄙諸城黑衣爲羌兵鼓噪陵之親率內參臨拒或實彎弓射人
自晉陽東巡單馬馳驚衣解髮散而歸又好不急之務會一夜索
蝎及旦得三升特愛非時之物取求火急皆須朝徵夕辦當勢者
因之貸一而責十焉賦斂日重徭役日煩人力旣殫帑藏空竭乃
賜諸佞幸賣官或得郡兩三或得縣六七各分州郡下逮鄉官亦
多隆中者故有敕用州主簿敕用郡功曹於是州縣職司多出富
商大賈競爲貪縱人不聊生爰自鄴都及諸州郡所在徵稅百端
俱起凡此諸役皆漸於武成至帝而增廣焉然未嘗有帷薄淫穢
唯此事頗優於武成云初河清末武成夢大蝟攻破鄴城故索境
內蝟膏以絕之識者以後主名聲與蝟相協亡齊徵也又婦人皆
翦剔以著假髻而危邪之狀如飛鳥至於南面則善心正西始自

宮內爲之被於四遠天意若曰元首翦落危側當走西也又爲刀
子者刃皆狹細名曰盡勢遊童戲者好以兩手持繩拂地而却上
跳且唱曰高末高末之言蓋高氏運祚之末也然則亂亡之數蓋
有兆云

論曰武成風度高爽經算弘長文武之官俱盡謀力有帝王之量
矣但愛狎庸豎委以朝權帷薄之間淫侈過度滅亡之兆其在斯
乎玄象告變傳位元子名號雖殊政猶已出迹有虛飾事非憲典
聰明臨下何易可誣又河南河間樂陵等諸王或以時嫌或以猜
忌皆無罪而殞非所謂知命任天體大道之義也後主以中庸之
姿懷易染之性永言先訓教匪義方始自襁褓至於傳位隔以正
人閉其善道養德所履異乎春誦夏弦過廷所聞莫非不軌不物
輔之以中官妳媪屬之以麗色淫聲縱鞫繼之娛恣朋淫之好語

曰從惡若崩蓋言其易武平在御彌見淪胥罕接朝士不親政事
一日萬機委諸凶族內侍帷幄外吐絲綸威厲風霜志迴天日虐
人害物搏噬無厭賣獄鬻官谿壑難滿重以名將貽禍忠臣顯戮
始見浸溺之萌俄觀土崩之勢周武因機遂混區夏悲夫蓋桀紂
罪人其亡也忽焉自然之理矣

鄭文貞公魏徵總而論之曰神武以雄傑之姿始基霸業文襄以
英明之略伐叛柔遠于時喪君有君師出以律河陰之役摧宇文
如反掌渦陽之戰掃侯景如拉枯故能氣懾西隣威加南服王室
是賴東夏宅心文宣因累世之資膺樂推之會地居當壁遂遷魏
鼎懷譎詭非常之才運屈奇不測之智網羅俊乂明察臨下文武
名臣盡其力用親戎出塞命將臨江定單于於龍城納長君於梁
國外內充實疆場無警胡騎息其南侵秦人不敢東顧既而荒淫

敗德罔念作狂爲善未能忘身餘殃足以傳後得以壽終幸也胤
嗣不永宜哉孝昭地逼身危逆取順守外敷文教內蘊雄圖將以
牢籠區域奄有函夏享齡不永績用無成若或天假之年足使秦
吳旰食武成卽位雅道陵遲昭襄之風摧焉已墜暨乎後主外內
崩離衆潰于平陽身禽于青土天道深遠或未易談吉凶由人抑
可揚權觀夫有齊全盛控帶遐阻西包汾晉南極江淮東盡海隅
北漸沙漠六國之地我獲其五九州之境彼分其四料甲兵之衆
寡校帑藏之虛實折衝千里之將帷幄六奇之士比二方之優劣
無等級以寄言然其太行長城之固自若也江淮汾晉之險不移
也帑藏輸稅之富未虧也士庶甲兵之衆不缺也然而前王用之
而有餘後主守之而不足其故何哉前王之御時也沐雨櫛風拯
其溺而救其焚信必賞過必罰安而利之旣與其其存亡故得同

其生死後主則不然以人從欲損物益已雕牆峻宇甘酒嗜音鄠
肆遍於宮園禽色荒於內外俾晝作夜罔水行舟所欲必成所求
必得既不軌不物又暗於聽受忠信弗聞萋斐必入視人如草芥
從惡如順流佞闖處當軸之權婢媼擅回天之力賣官鬻獄亂政
淫刑剝削被於忠良祿位加於犬馬讒邪並進法令多聞持瓢者
非止百人搖樹者不唯一手於是土崩瓦解衆叛親離瞻周道
咸有西歸之志方更盛其宮觀窮極荒淫謂黔首之可誣指白日
以自保驅倒戈之旅抗前歌之師五世崇基一舉而滅豈非鑄金
石者難爲功摧枯朽者易爲力歟抑又聞之皇天無親唯德是輔
天時不如地利地利不如人和齊自河清之後逮于武平之末土
木之工不息嬪嬙之選無已征稅盡人力殫物產無以給其求江
海不能贍其欲所謂火旣熾矣更負薪以足之數旣窮矣又爲惡
亡蓋亦由人匪唯天道也

以促之欲求大廈不燔延期過曆不亦難乎由此言之齊氏之敗
亡蓋亦由人匪唯天道也

北史卷八

北史卷八 齊本紀下第八 終



